

اليوم الأول من سلسلة " الطريق إلى القرآن "

(باللهجة المصرية)

رابط المادة : <http://www.way2allah.com/modules.php?name=Khotab&op=Details&khid=103>



الدرس ده رسالة

رسالة عاوز أوصلها لكل شاب ملتزم ، يعنى الرسالة دي قد يكون الواحد بدأ يدركها من خمس ست سنين ، ووقتها يعنى تلاقى مع الأخوة ، زميلك ، انتقادات ده يقول لك يعنى انت عايز القراء ؟ يا جماعة عايزين نتربى قلبياً بالقراء ، يا جماعة عايزين نخرج منهج دعوة كامل بالقراء ، يا جماعة المعجزة لا يصنعها إلا معجزة ، عشان واحد زي أو زى فلان أو فلان يبقى مصعب أو معاذ أو سلمان دى معجزة أصلا ، طب والمعجزة لا يصنعها إلا معجزة والمعجزة الوحيدده اللى بين إيدينا هى القراء ، يا اخوانا فى الله لا يصلح البشر كلام البشر ، لا يصلح البشر إلا كلام رب البشر

عائزين نتربى على القرآن يا جماعة ، فدي أول ثمرة ، لعلها ثمرة صغيرة ، ولكن ربنا يبارك في القليل يا ذا الله سبحانه وتعالى ، عائزين يا جماعة نتربى قلبياً على القرآن ، عائزين في رمضان ده إن شاء الله يا ذا الله نعيش مع معاني الإيمان في مدرسة القرآن ، يعني لما السيدة عائشة سألت عن رسول الله صلى الله عليه وسلم قالت " **كان قرآن يمشى على الأرض** " أنا مش هقول لك خليك قرآن يمشى على الأرض ، ما تقدرش إنك تجمع خمس ستلاف آية في حياتك ، ولكن يا أخى خليك سورة تمشى على الأرض ، ما أنتش قادر تبقى سورة تمشى على الأرض ، خليك آية تمشى على الأرض ، خليك معنى واحد من معاني آية واحدة من آيات كتاب الله تمشى على الأرض ، احنا معانا النهاردة يا ذا الله سبحانه وتعالى أول سورة من سور القرآن بعد سورة الفاتحة ، طبعاً إن شاء الله هيبقى لها لقاء منفرد ، أول سورة من سور القرآن وهى سورة البقرة ، أطول سور القرآن على الإطلاق ومن أول الحاجات اللي بتلغ ذهنك في سورة البقرة إسمها

إيه معنى كلمة البقرة ؟

كلمة البقرة يعنى يا جماعة حتى هذه اللحظة نص مليار بنى آدم على وجهه الأرض بيسجدوا للبقرة ، البقرة من أكبر الرموز الشركية اللى عبدت من دون الله على تاريخ الدنيا كلها ، بل فى الآثار الفرعونية القديمة يقول لك العجل أبيض صح ولا لآ ؟ وكثيراً جداً لما تقرأ فى القرآن هتلاقى ناس عبدوا العجل

فعبادة البقر وعبادة العجل ، عبادة هذه الأشياء ، حتى هذا الوقت نص مليار اللي يسجدوا لبوذى وللبقرة حتى الآن أكثر من اللي يسجدوا لله الواحد الديان ، أكثر من عدد المسلمين اللي يسجدوا لبوذى ويسجدوا للبقر يبقى إذن البقرة ده رمز شركى خطير ، طاب يا رب ليه سميت اسم السورة اسم البقرة ؟ طاب ده إذا هو رمز خطير ، دائما أسماء سور القرآن يبقى لها مقصد شديد ، مقصد عادى جدا

فى سورة البقرة ذكرت قصة البقرة بين سيدنا موسى وبنى إسرائيل ، سيدنا موسى يقول لبنى إسرائيل "وَإِذْ قَالَ مُوسَىٰ لِقَوْمِهِ إِنَّ اللَّهَ يَأْمُرُكُمْ أَنْ تَذْبَحُوا بَقَرَةً قَالُوا أَتَتَّخِذُنَا هُزُوًا ۖ قَالَ أَعُوذُ بِاللَّهِ أَنْ أَكُونَ مِنَ الْجَاهِلِينَ" البقرة : ٦٧ هو ربنا هيطلب منا نذبح بقرة ؟ "قَالَ أَعُوذُ بِاللَّهِ أَنْ أَكُونَ مِنَ الْجَاهِلِينَ" ، "قَالُوا ادْعُ لَنَا رَبَّكَ يُبَيِّنْ لَنَا مَا هِيَ" البقرة : ٦٨ إيه البقرة دى ؟ ما تذبحوا أى بقرة ، يا أخى بس قل لنا بس مواصفتها "قَالَ إِنَّهُ يَقُولُ إِنَّهَا بَقَرَةٌ : ٦٨ إيه يا جماعة ؟ أول كلمة "إِنَّهَا بَقَرَةٌ" قبل ما يقول لهم صفتها "لَا فَارِضٌ وَلَا بَكْرٌ عَوَانٌ بَيْنَ ذَلِكَ" فَافْعَلُوا مَا تُؤْمَرُونَ" البقرة : ٦٨ نفذوا

"قَالُوا ادْعُ لَنَا رَبَّكَ يُبَيِّنْ لَنَا مَا لَوْثُهَا قَالَ إِنَّهُ يَقُولُ إِنَّهَا بَقَرَةٌ" قبل "صَفَرَاءُ فَاقِعٌ لَوثُهَا" بقرة ؟ طاب ما احنا عارفين إنها بقرة خلاص ، قول إنه يقول إنها صفراء لكنها بقرة "صَفَرَاءُ فَاقِعٌ لَوثُهَا" طيب "قَالُوا ادْعُ لَنَا رَبَّكَ يُبَيِّنْ لَنَا مَا هِيَ إِنَّ الْبَقَرَ تَشَابَهَ عَلَيْنَا وَإِنَّا إِن شَاءَ اللَّهُ لَمُهْتَدُونَ" * قَالَ إِنَّهُ يَقُولُ إِنَّهَا بَقَرَةٌ لَا ذَلُولٌ تُثِيرُ الْأَرْضَ وَلَا تَسْقِي الْحَرْثَ مُسَلَّمَةٌ لَا شِئَ فِيهَا قَالُوا الْآنَ جِئْتَ بِالْحَقِّ فَذَبَحُوهَا وَمَا كَادُوا يَفْعَلُونَ" البقرة ٧٠ : ٧١

ليه سيدنا موسى مصر على كلمة بقرة ؟

عايزين ننتبه للنقطة دي ، بنى إسرائيل كان فى قلوبهم حب عبادة البقر ، حب عبادة العجل ، فربنا أراد إنه يطهر قلوبهم من حب العجل وحب البقر ، فأمرهم إن هم يذبحوا بقرة عشان يبقى برهان أمام الله إن ماعدش فى قلوبهم حب هذا الشرك ، عشان كدة كان دائما سيدنا موسى يقول إيه؟ "إِنَّهَا بَقَرَةٌ" "إِنَّهَا بَقَرَةٌ" "إِنَّهَا بَقَرَةٌ" وهما قاعدين يتحججوا وقاعدين يتباطئوا ، ربنا قال فى الآخر "فَذَبَحُوهَا وَمَا كَادُوا يَفْعَلُونَ"

يظل زمن لا يطيع !!!

أنا عايز نقف قدام كلمة "وَمَا كَادُوا يَفْعَلُونَ" لأن الكلمة دى بتاعتنا احنا ! كل أمر بنسمعه من أوامر ربنا يا جماعة بنقعد سنة على ما ننفذه !! يعنى ممكن شاب مثلا عرف مثلا أمر من أوامر ربنا من غير ما يضرب أمثله ، عرف إن الأغاني حرام ، ممكن يقعد سنة كاملة يسمع أغاني عما يسبها ، ممكن واحد عارف إن فى معصية معينة بيعملها حرام يقعد سنة كاملة على ما يسبها !!

"وَمَا كَادُوا يَفْعَلُونَ" يعنى خلاص كادوا ألا يفعلون ، خلاص جابوا آخرهم وبرضه فى آخر لحظة ، فده من علامة عدم الإسلام لله سبحانه وتعالى ، فقصة البقرة رمز من رموز التوحيد فى سورة البقرة ، فاسم البقرة لما ربنا يختاروا لسورة ، اسم يفكر بتوحيد الله سبحانه وتعالى ، وكذلك كل أسماء سور القرآن دائما بيبقى لها حكمة فعرنا الحكمة باعة اسم سورة البقرة ، طيب فى نفس الوقت موقع سورة البقرة ، يا جماعة القراءان المكى اللى نزل الأول ولا المدنى ؟ المكى ، السور اللى اتقالت فى الآخر ، يعنى الجزء التسعة والعشرين والثلاثين دول أول سور نزلت فى القراءان كانت المفروض تتحط فى الأول

والقرءان المدني ده آخر قرءان نزل أصلا وهو اللي محطوط في الأول ، طب ليه ترتيب المصحف عكس ترتيب التزول ؟ ربنا نزل الإيمانيات الأول وبعد كده كانت الأحكام ، ليه في المصحف الأحكام الأول وبعد كدة الإيمانيات ؟ هيبقى لنا أعدة فيها ، ولكن كحاجة سريعة ، لأن يعنى ربنا سبحانه وتعالى حرم الخمر على أربع مراحل ، طب اللي أسلم يوم ما المرحلة الرابعة نزلت ، كانوا يقول له لأ خليك انت شوية اشرب خمرة ، وبعد شوية نبقي مرحليا بقى نحرماها عليك ؟! ماعدش ينفع خلاص الدين كمل

لما الدين كمل ، عشان تدخل الدين ده لازم من على عتبة الباب بتاعه تعلن إنك انت موافق على كل أحكامه ، فلما ربنا يضع الأحكام في أول القرءان ، ما هوه اللي هيجي يسلم هيأخذ القرءان هيقرأه من الأول ، من أولها هيلقى الأحكام في وشه ، كأن ربنا بيقول إن من دلوقتي خلاص أى حد هيدخل باب بيت ربنا أو باب دين ربنا ، لازم يبقى موطن نفسه على مبدأ سمعنا وأطعنا ، مافيش حاجة إسمها إن واحدة تيجي تقول لى أنا هلبس الحجاب تدريجي الأول هطول الجنرلا وبعد كدة مأعرفش ، الكلام ده يتنسى يا جماعة ، من أولها يا خمار يا نقاب ، من أولها يا إزدال يا نقاب وكل شبه ، مافيش حاجة إسمها يا جماعة المرحلة في ترك المعاصي يبقى إذاً ليه ربنا وضع الأحكام في الأول ؟ عشان تعرف من أولها إن المبدأ اللي أنت دخلت عليه بيت ربنا ، سمعنا وأطعنا خلاص

تـمـيـز

طيب سورة البقرة يا جماعة من أخطر سور القرءان ليه ؟ المسلمين قبل ما تزول سورة البقرة ، كانوا مجتمع غير متميز أصلا ، يعنى لو جيت كنت نزلت المدينة قبل سورة البقرة ما تزل ، وأعدت مع المسلمين شوية ، مكونتش تلاقي فرق بينهم وبين الأمم الأخرى ، أو بينهم وبين أهل الكتاب ما فيش فرق ، كانت عبادتنا غير متميزة ، قبلتنا غير متميزة ، بنصلى في نفس القبلة اللي بيصلى نحيثها اليهود والنصارى ، كل ملامح المجتمع ده كانت غير متميزة سورة البقرة نزلت خلطنا مجتمع ، أى بنى آدم على وجه الكرة الأرضية هيجي يشوفنا أعديين الوقتي ، ده دول اسمهم المسلمين ، عرفت منين ؟ قبلتنا بقت قبلة متميزة ، آيات تحويل القبلة اللي نزلت فيها ، آيات تفصيل العبادات اللي نزلت فيها ، بقت عبادتنا عبادات متميزة عن أى دين آخر ، بقت مفاهمنا وأفكارنا متميزة عن أى حد على وجه الأرض ، فسورة البقرة أعطت لهذه الأمة التميز

مين صاحب سورة البقرة ؟

الرسول عليه الصلاة والسلام قال " اقرءوا الزهراوين البقرة وسورة آل عمران فإنهما تأتيان يوم القيامة كأنهما غمامتان أو كأنهما غيابتان أو فرقان من طير صواف تحاجان عن أصحابهما اقرءوا سورة البقرة فإن أخذها بركة وتركها حسرة ولا تستطيعها البطلة " رواه مسلم . عن مين ؟ عن قارئهما ؟! عن حافظهما ؟! عن صاحبيهما عايزين ناخذ بالناس من الكلمة دي كويس جدا يا جماعة ، عن صاحب البقرة وءال عمران ، اللي صحب السور ، يعنى تبقى سورة البقرة تمشي على الأرض ، تقدر تبقى البقرة وءال عمران تمشي على الأرض ؟ ما أنت لو عاوزهم يجوا زى غمامتان يوم القيامة يقوق حر الشمس ويقوق أى أهوال تحصل لك

يعنى من الآخر كدة لما سورة البقرة يتزل فيها تشريع الربا ، اللي كل الربا وكل فوايد البنوك ، ينفع سورة البقرة تيجي تحج عنه ؟ لما ءال عمران نازلة عشان تقول لنا اقفوا في وجه الحرب اللي قائمة ضد الإسلام ، لما أنت تقول

وأنا مالى ، وأنا كل قضيتى فى حياتى مشاكلى الخاصة ، سورة ءال عمران اللى نازلة تقول لك إن فيه مسئولية عليك تجاه دينك هتحتاج عنك يوم القيامة ؟ مش ممكن يا جماعة ، لما سورة البقرة نزل فيها أحكام الطلاق والعدل ما بين الزوجين ، واحد ظلم زوجته وبهدلها أو هى بهدلته فى المحاكم ولم يتبعوا شرع الله مع بعض ، تيجى البقرة تحتاج عنهم يوم القيامة ؟

يبقى وأنت بتقرأ أحكام سورة البقرة خد بالك ، لأن سورة البقرة دي بالذات انتم عارفين المايا ولو واحد وقف فى وش المايا بيقوا عكس بعض بالظبط يعنى الملامح متقابلة كدة عكس بعض ، أهو احنا المجتمع بتاعنا يا جماعة لو نزلت عليه سورة البقرة هتلاقى تطابق عجيب فى التضاد ما بين سورة البقرة وما بين المجتمع بتاعنا ، لا يوجد حكم واحد فى سورة البقرة غير منتهك فى المجتمع اللى احنا عايشين فيه ، واحنا أول ناس منتهكين ليه ، لما هندخل شوية فى السورة هنتبين هذا الأمر

يبقى إذن وأنت بتقرأ سورة البقرة خد بالك من أحكامها كويس جدا ، **لو حكم من الأحكام دي أنت مش مطبقة يبقى أنت لست من أصحاب أى الذين صحبوا سورة البقرة** ، عايزين نصحبها فى حياتنا ياذن الله

الظعن فى الإسلام

سورة البقرة موضعها إيه ؟ سورة البقرة من السور اللى حصل بسببها مشكلة كبيرة جدا ، مشكلة كبيرة ؟! المستشرقين من أكثر المطاعن اللى بيطعنوها فى الإسلام فى سورة البقرة ، يقول لك إيه ده ٢٨٦ آية ، سورة ٤٠ صفحة ، انت مانتاش عارف انت داخل منين وطالع منين ، لقيت نفسك فى موضوع فجأة الموضوع يتغير وتدخل فى موضوع تانى ، ده كلام المستشرقين لعنهم الله ، للأسف فى ناس من المسلمين المفسرين قالوا نفس الكلام ، يعنى كان أحد المفسرين ، المفسرين الكبار قال فى التفسير بتاعه إن سورة البقرة لا يوجد رابط ما بين آياتها ، هو بيقول كدة كإنها معلومة عادية يعنى ، مافيش ترابط بين آيات سورة البقرة ، بل أحد المفسرين حب إن هو يزوقها شوية فقال إيه ؟ قال أحكام سورة البقرة عاملة زى الدستور كدة ، زى دستور مصر دستور أى بلد ، هو الدستور لازم يكون فى رابط ما بين المادة واحد والمادة اتنين ، لأ هو المهم المواد بتغطى القانون و خلاص ، يعنى هو بيحاول يفننها

ده طبعاً يا جماعة مع احترامنا لمن قاله ، فلا نحترم القول نفسه ، يعنى نحترم اللى قاله ولا نحترم القول ، إزاي ؟! ده كلام الله ، كلام ربنا سبحانه وتعالى ، مافيش كلمة فى القرآن مالهش حكمة ، ده احنا بتتكلم دلوقتى فى اسم سورة البقرة نفسها ، اسم السورة ، يبقى الآيات اللى موجودة جوة السورة مافيش ترابط بينها وبين بعض ؟! ده لو واحد قال قصيدة مافيش تربط بين أبياتها وبعض ، القصيدة تفشل ماتنفعش ، يبقى سورة البقرة سورة مترابطة جدا ما بينها وبين بعض ، وحدة واحدة وليها فكرة واحدة بتدور كلها حوالها

إيه الفكرة الموضوعية فى سورة البقرة ؟

أول ما هنبدأ فى سورة البقرة وهندخل فيها ، هنلاقى خمس آيات بتتكلم عن المؤمنين " **الْمُذَكَّرُ الْكِتَابُ لَا رَيْبَ فِيهِ هُدًى لِّلْمُتَّقِينَ * الَّذِينَ يُؤْمِنُونَ بِالْغَيْبِ وَيُقِيمُونَ الصَّلَاةَ وَمِمَّا رَزَقْنَاهُمْ يُنْفِقُونَ** " البقرة ١ : ٣ وبعد كدة آيتين بيتكلموا عن الكفار " **إِنَّ الَّذِينَ كَفَرُوا سَوَاءٌ عَلَيْهِمْ أَلَّذَرْتَهُمْ أَمْ لَمْ تُنذِرْهُمْ لَا يُؤْمِنُونَ** " البقرة : ٦

وبعد كدة ١٣ آية يتكلموا عن المنافقين ، ربنا ييوصف المنافقين ويوصف " وَمِنَ النَّاسِ مَن يَقُولُ آمَنَّا بِاللَّهِ وَبِالْيَوْمِ
الْآخِرِ وَمَا هُمْ بِمُؤْمِنِينَ " البقرة : ٨ بعد كدة آيات يتكلم عن دعوة المشركين "يَا أَيُّهَا النَّاسُ اعْبُدُوا رَبَّكُمُ الَّذِي
خَلَقَكُمْ وَالَّذِينَ مِنْ قَبْلِكُمْ لَعَلَّكُمْ تَتَّقُونَ " البقرة : ٢١ لغاية ما تنتهي المقدمة عند قصة سيدنا آدم ، المفروض نبقي
قاريين الجزء اللى بنشرحه بإذن الله عشان تبقوا معايا على طول فى الآيات اللى أنا بقولها ، يبقى إذن سورة البقرة
بتتكون من مقدمة بتكلم عن أربع أصناف مؤمنين ، كفار ، منافقين ، مشركين ، ده المقدمة أول ما تنتهي المقدمة
فورا بتبدأ فورا قصة سيدنا آدم

"وَإِذْ قَالَ رَبُّكَ لِلْمَلَائِكَةِ إِنِّي جَاعِلٌ فِي الْأَرْضِ خَلِيفَةً قَالُوا أَتَجْعَلُ فِيهَا مَن يُفْسِدُ فِيهَا وَيَسْفِكُ الدِّمَاءَ " إلى آخر
الآيات لغاية ما بتخلص قصة سيدنا آدم عند قول الله " قُلْنَا اهْبِطُوا مِنْهَا جَمِيعًا " هبوط سيدنا آدم وهبوط حواء
وهبوط ابليس ، كله هبط إلى الأرض "قُلْنَا اهْبِطُوا مِنْهَا جَمِيعًا فَإِمَّا يَأْتِيَنَّكُمْ مِنِّي هُدًى فَمَن تَبَعَ هَذَا فَلَا خَوْفَ عَلَيْهِمْ
وَلَا هُمْ يَحْزَنُونَ * وَالَّذِينَ كَفَرُوا وَكَذَّبُوا بِآيَاتِنَا أُولَٰئِكَ أَصْحَابُ النَّارِ هُمْ فِيهَا خَالِدُونَ " البقرة ٣٨ : ٣٩ ده قصة
آدم ، أول ما بتخلص قصة آدم فورا بدون ولا أى آية فى النص بتبدأ قصة بنى إسرائيل

" يَا بَنِي إِسْرَائِيلَ اذْكُرُوا نِعْمَتِيَ الَّتِي أَنْعَمْتُ عَلَيْكُمْ وَأَوْفُوا بِعَهْدِي أُوفِ بِعَهْدِكُمْ وَإِيَّايَ فَارْهَبُونِ " البقرة : ٤٠
ونفضل حوالى جزء كامل نتحقق من أفعال بنى إسرائيل فى حق الله وفى حق الأنبياء وفى حق كتب الله لغاية ما تنتهى
قصة بنى إسرائيل بقول الله " يَا بَنِي إِسْرَائِيلَ اذْكُرُوا نِعْمَتِيَ الَّتِي أَنْعَمْتُ عَلَيْكُمْ وَأَنِّي فَضَّلْتُكُمْ عَلَى الْعَالَمِينَ "
البقرة : ١٢٢

وأول ما بتخلص قصة بنى إسرائيل فورا بدون ولا أى آية فى النص ، بتبدأ قصة سيدنا إبراهيم "وَإِذْ ابْتَلَىٰ إِبْرَاهِيمَ
رَبُّهُ بِكَلِمَاتٍ فَأَتَمَّهُنَّ قَالَ إِنِّي جَاعِلُكَ لِلنَّاسِ إِمَامًا " وأول ما بتخلص قصة سيدنا إبراهيم عند قول الله "تِلْكَ أُمَّةٌ قَدْ
خَلَتْ لَهَا مَا كَسَبَتْ وَلَكُمْ مَا كَسَبْتُمْ وَلَا تُسْأَلُونَ عَمَّا كَانُوا يَعْمَلُونَ " البقرة : ١٤١ بتبدأ فورا قصتنا احنا ، بيبدأ
شوط كامل ، جزء كامل كله أحكام وأوامر ونواهى وتكاليف ربنا مترها لنا من أول آيات تحويل القبلة
"سَيَقُولُ السُّفَهَاءُ مِنَ النَّاسِ مَا وَلَاهُمُ عَن قِبَلَتِهِمْ" يبقى إذن بتكون من المقدمة ، ثم ثلاث قصص ورا بعض مباشرة
قصة سيدنا آدم احنا عايزين نعرف الرابط ما بين القصص دي ، قصة سيدنا آدم ، ثم قصة بنى إسرائيل ، ثم قصة
سيدنا إبراهيم ، وأول ما بتنتهى الثلاث قصص فورا بيبدأ جزء كامل أحكام وتكاليف وأوامر ونواهى لينا احنا ، ثم
آخر ثلاث آيات بعد ما بتنتهى الأحكام والتكاليف مباشرة ، آخر ثلاث آيات فى السورة اللى هم الخاتمة بتاعة
السورة " لِلَّهِ مَا فِي السَّمَاوَاتِ وَمَا فِي الْأَرْضِ وَإِنْ تُبَدُّوا مَا فِي أَنْفُسِكُمْ أَوْ تُخَفُّوهُ يُحَاسِبْكُمْ بِهِ اللَّهُ "
البقرة : ٢٨٤ إلى آخر الآيات

ايه الرابط ما بين الكلام ؟

ايه الترابط اللى ما بين الكلام ده ؟ الرابط اللى ما بين الكلام ده يا جماعة المقدمة بتحلل لك المجتمع اللى نزلت فيه
سورة البقرة بتقول لك إن فى ناس مؤمنين دي صفاقم أهو ، وفى كفار صفاقم أهو ، وفى منافقين صفاقم أهو ، وفى
مشركين صفاقم أهو ، أصبح فى حالة تمايز فى المجتمع ، أصبح المؤمنين متميزين فى وسط المجتمع ، فلما تميزوا تميز
الكفر وتميز النفاق وتميز الشرك وتميز الإيمان فى النص

إيه الرابط ما بين التلاته ؟

الخليفة الأول سيدنا آدم : " وَعَصَى آدَمُ رَبَّهُ فَغَوَى " ثم اجتباه فتاب عليه وهدى طه : ١٢١ يعنى فى الأول عصى بس رجع بعد كدة أسلم لله واتبع أمر الله ، ولكن كان نتيجة معصيته إنه نزل من الجنة إلى الأرض ، يبقى إذا عصى وبعد كدة أطاع

الخليفة الثاني بنى إسرائيل : عصى تمام العصيان ١٠٠% معصية ، نيلوا الدنيا ، ماسبوش جريمة في حق الله ولا حرمة من حرمت الله إلا وانتهكوها ، يبقى النموذج الثاني اللي همه جابوا ٠ %

النموذج الثالث " وَإِذِ ابْتَلَىٰ إِبْرَاهِيمَ رَبُّهُ بِكَلِمَاتٍ فَأَتَمَّهُنَّ " جاب ١٠٠% ، أو ٢٠.٥ و ١٠٠% ، الخليفة اللي أحسن تمام الإحسان

كأن ربنا قبل ما يأمرنا وينهانا ، قال لنا أنا أمرت قبلكم ونهيت ثلاثة ، واحد عصي ثم أطاع ، وواحد عصي تمام العصيان ، وواحد أطاع تمام الطاعة ، **إنتم هتبقوا مين فى الثلاثة؟؟ أنتم لما هتزل الأوامر والنواهي عليكم هتتبعوا أى نموذج من النماذج؟؟** فقام ربنا منزل لنا جزء كامل كله أوامر ونواهي عشان يختبر سمعنا وطاعتنا

الخاتمة الجميلة... وامتحان للصحابة

ثم كانت الخاتمة ، الفكرة الجميلة أوى في السورة ، إن ربنا قبل ما ينهى السورة امتحن الأمة المسلمة زمان ، امتحان ففهموا الدرس ده ولا لأ ، طبقوا الدرس ده ولا لأ ، فتزل آية " **لِّلّٰهِ مَا فِي السَّمَاوَاتِ وَمَا فِي الْأَرْضِ** " اللى هيا آية الخاتمة "**وَإِنْ تُبَدُّوْا مَآفِي أَنْفُسِكُمْ أَوْ تُخَفُّوْهُ يُحَاسِبْكُم بِهِ** " يااااااه الصحابة طبعاً فرعوا ، ده ممكن الواحد قبل ما ينام كده يفكر فى أى حاجة كدة ، يعنى ممكن الواحد يجي على دماغه أى شئ ، يعنى ممكن الواحد يحس بأى شعور مش كويس فى صدره فى أى لحظة ، والا يشوف معصية فيفكر فيها شوية ، ربنا هيحاسبني بده ؟ إزاي ده احنا نضيع ! راحوا لرسول الله صلى الله عليه وسلم ، جثوا على ركبتهم قدام رسول الله صلى الله عليه وسلم ، قالوا له يا رسول الله: " **أي رسول الله ! كلفنا من الأعمال ما نطبق الصلاة والصيام والجهاد والصدقة وقد أنزلت عليك هذه الآية ولا نطيقها** " الآية دي مانقدرش نستحملها ، شوخوا الرسول عليه الصلاة والسلام شوخوا قال لهم إيه ، فقال لهم

رسول الله صلى الله عليه وسلم "أتريدون أن تقولوا كما قال أهل الكتابين من قبلكم : سمعنا وعصينا ؟ بل قولوا : سمعنا وأطعنا غفرانك ربنا وإليك المصير" رواه مسلم فلما قالوها وأكثروا منها نزل التخفيف من الله ، التخفيف هو إيه ؟ "لَا يُكَلِّفُ اللَّهُ نَفْسًا إِلَّا وُسْعَهَا لَهَا مَا كَسَبَتْ وَعَلَيْهَا مَا اكْتَسَبَتْ"

نجاح الصحابة رضوان الله عليهم

نزل التخفيف من الله سبحانه وتعالى ، الإمتحان ده يا جماعة هتشوفوا ربنا أثبت في القرآن نجاح الصحابة فيه "لِلَّهِ مَا فِي السَّمَاوَاتِ وَمَا فِي الْأَرْضِ وَإِنْ تُبْدُوا مَا فِي أَنْفُسِكُمْ أَوْ تُخْفُوهُ يُحَاسِبْكُمْ بِهِ اللَّهُ فَيَغْفِرُ لِمَنْ يَشَاءُ وَيُعَذِّبُ مَنْ يَشَاءُ وَاللَّهُ عَلَى كُلِّ شَيْءٍ قَدِيرٌ" البقرة : ٢٨٤ شوفوا بقى نجحوا في الإمتحان إزاي "آمَنَ الرَّسُولُ بِمَا أُنزِلَ إِلَيْهِ مِنْ رَبِّهِ وَالْمُؤْمِنُونَ كُلٌّ آمَنَ بِاللَّهِ وَمَلَائِكَتِهِ وَكُتُبِهِ وَرُسُلِهِ لَا نُفَرِّقُ بَيْنَ أَحَدٍ مِنْ رُسُلِهِ" البقرة : ٢٨٥ تلقوا الأمر والنهي بالإيمان بالله ، مش الجحود بنعمة الله ويدوا ظهرهم لله "وَقَالُوا سَمِعْنَا وَأَطَعْنَا" نفذنا يا رب أى أمر هتأمرنا به هنفذ يا رب "وَقَالُوا سَمِعْنَا وَأَطَعْنَا غُفْرَانُكَ رَبَّنَا" طب ليه بعد كلمة "سَمِعْنَا وَأَطَعْنَا غُفْرَانُكَ رَبَّنَا" ما احنا قلنا "سَمِعْنَا وَأَطَعْنَا" خلاص ، لأ كيان يا جماعة من كتر رغبتهم إن هما ينفذوا أمر ربنا ١٠٠% ، بيقولوا يا رب لو فى ١% وقع منا فى التنفيذ اغفره لنا يا رب ، يا رب لو الصلاة بتاعتنا ١% منها سرحنا فيها وقلنا ماكنش معاك اغفر لنا يا رب

وده دايما شعور المؤمن يا جماعة إنه يطيع ولا يستبدل بالطاعة الأحساس يانه بيزداد فى الذنب ، عشان كدة بعد صلاة قيام الله "الْمُسْتَغْفِرِينَ بِالْأَسْحَارِ" طب بتستغفر بعد ساعتين قيام ليه ؟ لأن العبادة كسرت قلبك لله أكثر وأكثر ليه ؟ لأنك أنت دلوقتى فى الدور الخامس شايف كتير ، طاب طلعت العاشر شفت أكثر ، طلعت العشرين شفت أكثر ، أنت كل ما بتعبد ربنا بتطلع ، وكل ما بتطلع إيمانك بيخليك تشوف مجالات من مجالات الإيمان أكثر فتحس بذنبك أكثر لأنك حسيت بعظمة الله أكثر "وَقَالُوا سَمِعْنَا وَأَطَعْنَا غُفْرَانُكَ" ده قول المسلمين لله

إيه الفرق بين العفو والمغفرة ؟

"وَقَالُوا سَمِعْنَا وَأَطَعْنَا غُفْرَانُكَ رَبَّنَا وَإِلَيْكَ الْمَصِيرُ" البقرة : ٢٨٥ ربنا سبحانه وتعالى لما وجد استجابتهم الإيمانية قال لهم "لَا يُكَلِّفُ اللَّهُ نَفْسًا إِلَّا وُسْعَهَا لَهَا مَا كَسَبَتْ وَعَلَيْهَا مَا اكْتَسَبَتْ" فتوجهوا لله بدعاء جميل أوى ، ٣ أدعية يا جماعة شوفوا الدعاء "رَبَّنَا لَا تُؤَاخِذْنَا إِنْ نَسِينَا أَوْ أَخْطَأْنَا رَبَّنَا وَلَا تَحْمِلْ عَلَيْنَا إِصْرًا كَمَا حَمَلْتَهُ عَلَى الَّذِينَ مِنْ قَبْلِنَا رَبَّنَا وَلَا تُحَمِّلْنَا مَا لَا طَاقَةَ لَنَا بِهِ رَبَّنَا" البقرة : ٢٨٦

"لَا تُؤَاخِذْنَا إِنْ نَسِينَا أَوْ أَخْطَأْنَا" رسول الله صلى الله عليه وسلم قال "رفع عن أمتي الخطأ والنسيان" صح ؟ يبقى اللى يرفع عنك ده يعنى ماتسألش عنه خالص ، ده بيتسمى فى الدين إيه ؟ العفو ، العفو يعنى إنك أنت لو ربنا عفا عنك ، اللى هو دعاء ليلة ٢٧ أو ليلة القدر ، لو ربنا عفا عنك مايسألشك عن الذنب أصلا ، الذنب يتمسح من الصحيفة بتاعتك ، إنما المغفرة من الذنب يفضل وربنا يقرك عليه يوم القيامة ويقول لك مش هعذبك به ، فإذن أول طلب طلبوا من الله العفو "رَبَّنَا لَا تُؤَاخِذْنَا إِنْ نَسِينَا أَوْ أَخْطَأْنَا" يعنى يا رب ماتسألناش عن الكلام ده اعفوا عنا "رَبَّنَا وَلَا تَحْمِلْ عَلَيْنَا إِصْرًا كَمَا حَمَلْتَهُ عَلَى الَّذِينَ مِنْ قَبْلِنَا"

ثلاث أدعية جميلة

مين اللى فى السورة حمل عليه الإصر؟ بنى إسرائيل ، مين اللى فى السورة نسى وأخطأ ؟ آدم ، اللى فى السورة نسي وأخطأ آدم ، يبقى أول دعاء يا رب متعاملناش زى ما عاملت آدم يا رب ، لو غلطنا زى ما سيدنا آدم عصاك ما تحرمناش من فضلك يا رب

تانى دعاء يا رب لو أخطأنا زى ما بنى إسرائيل أخطئوا ما تحملش علينا إصر زى ما حملت عليهم يا رب ، يبقى تانى دعاء "رَبَّنَا وَلَا تَحْمِلْ عَلَيْنَا إَصْرًا كَمَا حَمَلْتَهُ عَلَى الَّذِينَ مِنْ قَبْلِنَا" البقرة : ٢٨٦ طب ربنا حمل إصر على بنى إسرائيل ليه ؟ بذنوبهم ، يبقى كإنيك بتقول يا رب اغفر لنا ليه ؟ لأن هوه عشان ما يحملش عليك إصر بذنوبك لازم يغفر لك "رَبَّنَا وَلَا تَحْمِلْنَا مَا لَا طَاقَةَ لَنَا بِهِ" البقرة : ٢٨٦

لما تلاقى واحد ماشى فى الشارع سايق دابة كدة ، وقاعد يضربها بالعصايه ، يضربها بالعصاية تقول له يا أخى انت مافيش فى قلبك رحمة؟! يبقى لما بتقول يا رب ما تحملنيش فوق طاقتي ، كإنيك بتقول يا رب ارحمني ، عشان كدة ربنا جه بعدها قال "واعفوا عنا واغفر لنا وارحمنا" كإنيك اجمال بعد تفصيل ، بعد ما فصلنا الدعاء اجمالنا فى الآخر ، يا رب بنطلب العفو وبنطلب المغفرة وبنطلب الرحمة ، والأدعية اللى دعوها ، العقوبات اللى جت فى السورة ، ما تعاملناش زى ما عاملت سيدنا آدم ، لو أخطأنا يا رب ، يانك أنت تؤاخذنا إن نسينا أو أخطأنا ، ما تعاملناش زى ما عاملت بنى إسرائيل فى السورة يا رب ، إنك أنت تحمل عليهم إصر لو أذنبوا ، ما تعاملناش زى ما عاملت قوم طالوت اللى هوه فى سورة البقرة اللى هنشرحها إن شاء الله فى الجزء التانى ، آخر الجزء التانى لما قالوا " قَالُوا لَا طَاقَةَ لَنَا الْيَوْمَ بِجَالُوتَ وَجُنُودِهِ " لا طاقة لنا اليوم يعنى مالناش طاقة بقى بالكلام ده "رَبَّنَا وَلَا تَحْمِلْنَا مَا لَا طَاقَةَ لَنَا بِهِ لَعَفُو عَنَا وَارْحَمْنَا"

الدعاء فى آخر سورة آل عمران

يا جماعة اللى هوه "رَبَّنَا إِنَّا سَمِعْنَا مُنَادِيًا يُنَادِي لِلْإِيمَانِ أَنْ آمِنُوا بِرَبِّكُمْ فَآمَنَّا رَبَّنَا فَاغْفِرْ لَنَا ذُنُوبَنَا وَكَفِّرْ عَنَّا سَيِّئَاتِنَا وَتَوَفَّنَا مَعَ الْأَبْرَارِ" آل عمران : ١٩٣ الدعاء ده ربنا استجابه ولا لأ ؟ استجابه فى السورة "فَاسْتَجَابَ لَهُمْ رَبُّهُمْ أَنِّي لَا أُضِيعُ عَمَلَ عَامِلٍ مِنْكُمْ مِنْ ذَكَرٍ أَوْ أُنْثَى" آل عمران : ١٩٥ طب الدعاء اللى فى آخر سورة البقرة ليه ربنا ما ذكرش فيه الإستجابة زى ما ذكر الإستجابة فى دعاء آخر آل عمران ليه ؟ لأن الدعاء بتاع آخر سورة البقرة ده دعاء مشروط ، ربنا ذكر الإستجابة بس للصحابه بس فى صحيح البخارى ، إنما احنا ربنا ما ذكرش الإستجابة فى القرآن ليه ؟

ليه احنا معرضين للعقوبات دي فى أى لحظة ؟

بالرغم إن الدعاء مذكور فى القرآن ؟ كإني ربنا بيقول أنا ممكن استجيب لكم زى ما استجبت للصحابه بس بشرط إنكم تحققوا نفس الشرط اللى الصحابه حققوه ، وهوا شرط إيه ؟ "سَمِعْنَا وَأَطَعْنَا غُفْرَانَكَ رَبَّنَا" إنك أنت تبقى نيتك يا رب أنا نفسى أطيعك ، يا رب لو أنا عجزت مرة تبقى غصبن عني ، لو نسيت مرة تبقى غصبن عني ، إنما إنك أنت تبقى كل حياتك معصيه تعمديه فى حق الله يبقى هيحصل العقوبات اللى احنا بنشوفها فى حياتنا يا جماعة القاهرة لوحدها شافت ٥ عقوبات فى السنين اللى فاتت حد يعد معايا : فكرين بعث الجراد على القاهرة ، اللى

فكره يفكرون معايا ، فاكرين بعث الغربان ولغاية دلوقتي على القاهرة ؟ فاكرين زلزال القاهرة ؟ فاكرين سقوط المقطم ؟ فاكرين الدخان اللي غطى سماء القاهرة من ٣ سنين وقالوا ده حرق الرز ؟ طب ما الرز بيتحرق على طول يعنى ما كل سنة بنحرق الرز ، اشمعنى ؟ الدخان الكثيف ربنا أشار على نزوله فى سورة الدخان "فَارْتَقِبْ يَوْمَ تَأْتِي السَّمَاءُ بِدُخَانٍ مُبِينٍ * يَغْشى النَّاسَ هَذَا عَذَابٌ أَلِيمٌ * رَبَّنَا اكْشِفْ عَنَّا الْعَذَابَ إِنَّا مُؤْمِنُونَ" الدخان ١٠ : ١٢ وربنا ذكر إنه بيكشفه فى الدنيا ولكن لا يكشفه فى الآخرة ، يبقى كل ده عقوبات عشان إيه ما احنا بنتعاقب أهو ، ما احنا بيحمل علينا إصر أهو ، ما البطالة أهى ، ما العنوسة أهى ، ما مشاكل الدنيا أهى ، ما تغير الطقس أهو ، ما انتشار السرطان أهو ، ما مجيئ الأوبئة التى لم تعرف فى أسلافنا أهى ، ما النكد والغم والهمل راكبين الناس أهو ، يبقى حمل علينا إصر يا جماعة

إذا أخذنا ليه ؟

يبقى إذا أخذنا ربنا ، أخذنا ليه ؟ لأن ماعندناش مبدأ سمعنا وأطعنا ، سورة البقرة بتقول لك إن مبدأ سمعنا وأطعنا مبدأ حياتك ، لو هو مبدأ حياتك حتى لو غلطت ، ما خلاص ما أى انسان لازم يغلط ، لازم تغلط ولازم تذنّب ولازم تقع ، وبعد ما تقع تقوم وأغفر لك وأسمحك ، إنما إنك أنت تتعمد إنك تعيش حياتك بشعار سمعنا وعصينا لأ طيب دى الفكرة الأساسية العامة فى السورة اللي هيا إن سورة البقرة بتقول لنا أنتم مستخلفين الجدد ، هتقولوا سمعنا وأطعنا ؟ ولا هتقعوا مرة وبعد كدة تقوموا مرة ؟ ولا هتقولوا سمعنا وعصينا ؟ ولا هتبقوا زى سيدنا إبراهيم أئمة فى طاعة الله ؟ ده الفكرة الأساسية عايزين نأخذ ملامح إيمانية سريعة كدة ، رقيقة من كل فقرة من فقرات الجزء الأول ، بحيث احنا واحنا واقفين نصلى فى التراويح تبقى أنت عايش مع الآيات

حروف ... إعجاز وتحدى

أول شوط وأهم شوط اللي هو شوط المؤمنين "الم" البقرة : ١ "الم" دى إيه يا جماعة ؟ دي حروف ، يعنى إيه حروف يعنى ، عارف بالظبط كدة لما واحد تقول له مثلاً العربية اختراع عظيم ، يقول لك إيه يعنى العربية يعنى ده مافيهاش حاجة ، تقول له طيب خد شوية صفيح وشوية كاوتش وشوية مسامير واعملى عربية ، أهوه "ال، م" دي الحروف اللي منها القراء المعجز ؟ خدوها واعملوا لنا قرآن !!! يبقى إذا تحدى فى البداية تانى حاجة أنا بقول "الم" وأنا مش عارف معناها إيه ، طب وبتقولها ليه ؟ بقولها لأن أنا واثق إن ليها معنى من عند ربنا ، يعنى ربنا بيربيك من أول القراء إن الحاجة اللي متفهمهاش تقول إيه ؟ تقول سبحانه ربنا ، يا رب أنت ليك الحكمة ، سبحانه الله يعنى إيه ؟

يعنى لو حصلك حاجة ما أنتش فاهم حكمتها إيه ، لو شفت حاجة حصلت فى الواقع انت مش فاهم حكمتها إيه ، لو أمرت بتكليف من تكاليف الدين ما أنتش فاهم حكمتها إيه تقول سمعنا وأطعنا برضه ، لازم يبقى عندك ثقة فى الله تانى حاجة يا جماعة يبقى عندنا ثقة فى القراء "الم" يعنى ؟ "الم" يعنى الحروف أهى اعملوا لنا قرآن منها ، يعنى إيه ؟ يعنى احنا بنتحداكم وبتحدى الدنيا كلها إنما تعمل لنا قرآن ، يعنى وأنت بتقري الحروف المقطعة حس بالتحدى ، حس إن ربنا بيقول لك ثق فى منهجك لدرجة إنك تتحدى الدنيا كلها به ، ثق فى الدين يا جماعة ، ثقوا فى الإسلام ثقوا فى منهج رسول الله ، إنه المنهج الوحيد اللي يقدر يغير الناس ويصلحهم

دى هزيمة نفسية

عشان لما نلاقى بعض دعاة الفضائيات بيحدد يخبى شوية من الدين ، ويغير شوية من الدين ، ويمنتج شوية من الدين وتقول له ليه كده ؟ يقول لك عشان الناس تقبل الدين ، هزيمة نفسية ، هوا من كتر ما شاف الناس على المعاصي اقزم نفسياً إن الناس هتقبل الدين ، فبدأ يتخلى عن نص الدين ، عشان الناس تقبل النص التاني ، او عوا تنهزموا نفسياً وأنتم معاكم القراءان ربنا يقول : **"فَلَا تُطِعِ الْكَافِرِينَ وَجَاهِدْهُمْ بِهِ جِهَادًا كَبِيرًا"** الفرقان : ٥٢ مش بالزيت ، بالقراءان جهاداً كبيراً ، أقوى سلاح في أيدينا هو القراءان ، عشان كدة عاوزين ندرك قيمة هذا السلاح العظيم وهو كتاب الله سبحانه وتعالى

القرآن الكريم... مصدر الهداية

"الم" تحس بالتحدى وتحس بالثقة وأنت بتقراها وتحس بالفخر بالقراءان **"ذَلِكَ الْكِتَابُ"** البقرة : ٢ يعنى إيه **"ذَلِكَ الْكِتَابُ"** ؟ هو ده الكتاب ما فيش غيره **"ذَلِكَ الْكِتَابُ لَا رَيْبَ فِيهِ هُدًى لِّلْمُتَّقِينَ"** البقرة : ٢ هو ده الكتاب ، هو ده مصدر الهداية الوحيد ، الآيات دي فيها واقفين ، يا تقف عند **"ذَلِكَ الْكِتَابُ لَا رَيْبَ"** يا إما تقف عن **"ذَلِكَ الْكِتَابُ لَا رَيْبَ فِيهِ"** وتبقى **"هُدًى لِّلْمُتَّقِينَ"** ، سواء وقفت هنا أو هنا نفس المعنى وهو إن هو ده مصدر الهدى الوحيد ، علماء اللغة يقول لك تتابع المعرفين **"ذَلِكَ"** معرف و **"الْكِتَابُ"** معرف ، فتتابع المعرفين يدل على القصر والخصر ، هو ده الكتاب ، هو ده المصد الوحيد للى عايز هداية ، و هو ده اللى عايز وصول إلى الله ، هو ده مافيش سكه لربنا تانى إلا ده يا جماعة ، يبقى وظيفة حياتك وتحدى حياتك إنك تفهمه لأن مش هتوصل غير بيه أول صفات المؤمنين ... الإيمان بالغيب

"ذَلِكَ الْكِتَابُ لَا رَيْبَ فِيهِ هُدًى لِّلْمُتَّقِينَ * الَّذِينَ يُؤْمِنُونَ بِالْغَيْبِ" البقرة : ٢ : ٣ أول صفة ربنا وصف بيها الناس (المؤمنين) فى القراءان **"الَّذِينَ يُؤْمِنُونَ بِالْغَيْبِ"** لازم إيمان بالغيب ، لازم ماييقاش قلبك مع الماديات بس ، اللى ضيع الغرب كله النظرة المادية ، الكرسي ده أنا مؤمن بيه لأنى ماسكه فى إيدى أهوه ، لأ أنا مؤمن إن فى ملائكة معايا فى المسجد دلوقتى فى هذه اللحظة ، أنا مؤمن إن الملائكة بتحفنى فى هذه اللحظة ، أنا مؤمن يقين جازم إن لو بكرة رمضان الليلة هيبقى فيه ملك فى السما ، لو أنا عندى يقين هسمعه بودانى يقول : **"يا باغي الخير أقبل ويا باغي الشر أقصر"** صحيح أنا موقن بالغيب ، لازم يبقى عندك يقين بالغيب أول صفة

طب أول أمر ربنا أمر بيه المؤمنين فى القراءان كان إيه ؟

حد يعرفه ، أول أمر ؟ **"يَا أَيُّهَا النَّاسُ اعْبُدُوا رَبَّكُمُ الَّذِي خَلَقَكُمْ وَالَّذِينَ مِنْ قَبْلِكُمْ لَعَلَّكُمْ تَتَّقُونَ"** البقرة : ٢١ العبادة ، أول أمر العبادة ، لأنه أخطر وأهم أمر على الإطلاق فى القراءان ، إنك تبقى إنسان متعبد ، طيب **"الَّذِينَ يُؤْمِنُونَ بِالْغَيْبِ وَيُقِيمُونَ الصَّلَاةَ وَمِمَّا رَزَقْنَاهُمْ يُنْفِقُونَ"** البقرة : ٣ طاب يا رب ليه ماقلتش يقيمون الصلاة وللزكاة هم فاعلون ، أو يؤتون الزكاة ؟ فيه فرق بين الإنفاق وبين الزكاة ، الزكاة دي ٢.٥ %

إنما **"مِمَّا رَزَقْنَاهُمْ يُنْفِقُونَ"** يعنى إيه يا جماعة ؟ يعنى مش على قد ٢.٥ % ، يعنى ممكن يطلع لربنا ٥٠ % ٦٠ % ٩٠ % ، ممكن يطلع لربنا ماله كله ، طاب افرض هو معهوش نصاب زكاة أصلاً ، لو أنت على أد الزكاة يبقى لو معكش النصاب ، يعنى كل اللى معاك ثلاث أربع تلاف جنية مأكملوش نصاب مش هطلع ، إنما لو أنت من أهل هذه

الآية لو معاك بريزة هطلع شلن منها لله ، يبقى انت ما انتش متقيد بالزكاة ، ليه ؟ لأن ربنا هنا بيقول هدى ، لمن ؟ للمتقين اللي هم أعلى درجات الدين ، احنا بتتكلم عن أعلى الدين دلوقتى "الَّذِينَ يُؤْمِنُونَ بِالْغَيْبِ وَيُقِيمُونَ الصَّلَاةَ وَمِمَّا رَزَقْنَاهُمْ يُنْفِقُونَ * وَالَّذِينَ يُؤْمِنُونَ بِمَا أُنزِلَ إِلَيْكَ وَمَا أُنزِلَ مِنْ قَبْلِكَ" البقرة ٣ : ٤

يعنى هنا ربنا جاب العبادة قبل إيه ؟ "وَالَّذِينَ يُؤْمِنُونَ بِمَا أُنزِلَ إِلَيْكَ وَمَا أُنزِلَ مِنْ قَبْلِكَ" ربنا جاب العبادة قبل الإيمان ، عايزين نستفيد من دي يا جماعة ، إنك لن تصل إلى الإيمان إلا بالعبادة ، إن اللي عاوز يزود إيمانه يزود عبادته ، إن السبيل الأساسى للوصول إلى زيادة الإيمان فى القلب هو زيادة العبادة فى الجوارح ، خدوا بالكم من هذا الأمر تماماً يا جماعة لازم طريقك إلى الإيمان يكون هوا عبادة ربنا ، يعنى ربنا هنا ذكر الإيمان والعبادة ، خدوا بالكم إن افتتاحية القرآن نموذج المؤمن العابد ، إيمان وعبادة

أهو افتتاحية القرآن المؤمن العابد ، لأن نواة الإصلاح والتغير فى أى حاجة هو المؤمن العابد ، لو دخل الجهاد هيجاهد صح ، المؤمن العابد هو اللي لو نزل الجامعة هيدعوا إلى الله هيدعوا صح ، المؤمن العابد هو اللي لو جهه طلب منه تضحية هيضحى بكل شئ فى سبيل دينه ، المؤمن العابد ده اللي هيعمل كل حاجة ، يبقى اللي عايز يغير نفسه منكم لازم الأول يبقى مؤمن عابد ، لازم تتربى الأول قبل ما تقول لى أعمل كذا ولا أعمل كذا ولا أطلب حكم فقهي ، يا جماعة قبل كل ده لازم تتربى الأول إيماناً ، لازم المؤمن العابد فى الأول ، أول حاجة تصل بيها على الله سبحانه وتعالى

عشان كده نلاقى كل السور اللي بتتكلم عن الجهاد فى القرآن لازم قبلها سور إيمانية ، يعنى سورة التوبة والأنفال قبلهم سورة إيه ؟ الأنعام والأعراف سورة مكية إيمانية ، طيب سورة الأحزاب وسط شوط ال م المكي ، العنكبوت والروم وسبأ وفاطر ويس وسط كل الشوط ده أهو ، ليه ؟ قبلها وبعدها سورة مكية بتتكلم عن الله والدار الآخرة عشان لما قلبك يتشحن تدخل سورة الأحزاب تكلف بالجهاد تقوم تجاهد ، حتى السور اللي فيها التكاليف ، حتى السور اللي مفهاش جهاد بس فيها تكاليف زى سورة النور ، سورة النور مدنية كلها أحكام وتكاليف وحكم الحجاب ، سورة النور السورة اللي قبلها إيه ؟ المؤمنون مكية بتتكلم عن الله والدار الآخرة ، والسورة اللي بعدها إيه ؟ الفرقان مكية ، بتتكلم عن الله والدار الآخرة ، يبقى ربنا بيدكرك بالإيمانيات ، عشان لما تيجى تسمع التكاليف يبقى قلبك جاهز ومشحون إن هو يطبق ، كإنها رسالة ، محمد والفتح سور جهادية ، الشوط اللي قبلها الحوامين المكية اللي هي كلها بتتكلم عن النار وبتتكلم عن الدار الآخرة ، اللي بعدها سورة ق و الذاريات و الطور وانت نازل بقى كلها سور بتتكلم عن الدار الآخرة

يبقى ربنا وضع لك السور اللي فيها تكاليف قبلها وبعدها سور إيمانية ... ليه ؟

عشان يعلمك إن لازم عشان تقدر تنفذ التكاليف تتشحن إيماناً ، ناخذ بالناس من هذا الأمر ، ونخرج منه إن لازم المؤمن العابد الأول يا جماعة "وَالَّذِينَ يُؤْمِنُونَ بِمَا أُنزِلَ إِلَيْكَ وَمَا أُنزِلَ مِنْ قَبْلِكَ وَبِالْآخِرَةِ هُمْ يُوقِنُونَ" البقرة : ٤ ده فيه كلمة جديدة ظهرت كلمة يوقنون ، إيه الفرق بين كلمة الإيمان واليقين ؟ ما كان ممكن ربنا يقول لك وبالأخرة هم يؤمنون ، إيه الفرق بين الإيمان واليقين ؟ يعنى الرازى أورد معنى كلمة اليقين قال لك اليقين من "يقن الحوض" الحوض لما يتملى مية لآخره ، لضفة معينة كدة يتسمى يقن الحوض ، كإن اليقين إنك انت قلبك يتملى

إيمان ، ما عدش فيه زرة شهوة أو شهبة ، ماعدش في جواك أى ذرة لغير الله ، لم يعد فيك أى شئ لغير الله ، اليقين إنك تتملى بالإيمان ، تتعبى إيمان ، إمال الإيمان ؟ الإيمان يزيد وينقص ، الإيمان ممكن نص الحوض مليان ويتسمى مؤمن ، ثلاث أربع الحوض مليان تتسمى مؤمن ، يعنى فى شوية مية كدة وتتسمى مؤمن إنما اليقين إنك أنت اتمليت من جوة إيمانيات ، يبقى ربنا ذكر **"وَالَّذِينَ يُؤْمِنُونَ بِمَا أُنْزِلَ إِلَيْكَ وَمَا أُنْزِلَ مِنْ قَبْلِكَ"** البقرة : ٤ وبعد كدة **"وَبِالْآخِرَةِ هُمْ يُوقِنُونَ"** البقرة : ٤ اليقين الكامل ، بالصلاة هم يوقنون ، بالميزان هم يوقنون ، بالخشع هم يوقنون ، بالوقوف بين يدى الله هم يوقنون

طاب ييجى اليقين فى قلبى إزاي ؟

قبل ما تنام كل يوم امسك حاجة ، الليلة تمسك الصراط مثلاً تقعد تفكر فيه ، تتخيل فيه وتعيش إنك أنت ماشى على ، بكرة تتخيل الميزان وأعمالك بتتوزن وقلبك بيتوزن ، وجوارحك بتتوزن والملايكة وهى بتقيم ، يبقى إذا كل مرة تقعد تعيش قبل ما تنام مع حاجة من المعانى **"وَبِالْآخِرَةِ هُمْ يُوقِنُونَ"** البقرة : ٤ الإيمان ، فيه بعده يقين ، يعنى عبادة ثم إيمان ثم يقين ، ده احنا بنطلع فى سلم ، كإن ربنا بيقول لك إنك أنت طول ما انت ماشى فى السكة دي هتفضل تزيد لغاية ما توصل لليقين ، اللى هيفضل محافظ على نفسه فى بيت ربنا ، كل يوم هيقرب خطوة ويزيد خطوة ، والإيمان جوة قلبه يكسب موقع جديد ، ويطرد حتة من الشهوات والشبهات ، يعنى واحد يقول لك أنا عايز يبقى عندى يقين ، سؤال يعنى من الأسئلة المتكررة للشباب ، أنا عايز قلبى يتملى يقين ، أجيب يقين إزاي؟ عايز يبقى عندك يقين ؟ يعنى زى ما سيدنا عثمان رضي الله عنه : **"لو تهتك الحجب ورأيت الجنة والنار ورأيت ربي ما أزددت يقينا"**

خليك ماشى مع الطريق للقرءان زى ما رسمهولك ، اجتهاد فى العبادات هتزيد مع العبادات فى الإيمانيات ، تفضل تزيد تزيد لغاية ما تتملى تماماً بالإيمان ويبقى عندك يقين كامل ، يبقى عشان تصل إلى اليقين لازم تفضل ماشى فى الطريق ، والفائدة المهمة هنا لازم كل يوم تلاقى نفسك قربت من ربنا خطوة ، لازم ماهوه دلوقتى أنا عاوز أوصل مصر لو أنا النهاردة واقف فى الحلة وبكرة فى الحلة وبعده فى الحلة وبعده فى الحلة والسنة الجاية فى الحلة ، والنقطة اللى أنا واقف عندها هى النقطة اللى كنت واقف عندها فى رمضان اللى فات ، واللى هفضل واقف عندها رمضان الجاى طاب أنا عمرى ما هوصل ، يبقى عشان أوصل لازم كل يوم أقرب خطوة من هدفى ، يبقى عشان تصل إلى اليقين ، تصل إلى الله ، لازم كل يوم تقرب خطوة وشوف الكلمة الجميلة اللى ربنا بيقولها وبالآخرة هم إيه ؟ موقنون ، لأ **"يُوقِنُونَ"** مضارع الإستمرارية يا جماعة يقين مستمر يا جماعة ، يعنى مش آيات النار اتقرأت الركعة الأولانية فى صلاة التراويح بكيت ، بعد كدة آيات النار اللى بعدها بعد كدة ماتبكيش ! يقين مستمر ، يقين بيخليك فى تفاعل مستمر مع الآخرة ، طول ما أنت عايش وبيفيد برضه إنك أنت لازم تعمل على تجديد اليقين فى قلبك باستمرار بجهد العبادة واصلاح القلب

بل هو من عند الله

"أُولَئِكَ" البقرة : ٥ أولائك للرفعة أهل الرفعة **"أُولَئِكَ عَلَى هُدًى"** البقرة : ٥ **"عَلَى"** حرف استعلاء ، كإن الهدى ده جبل ، وهما من كتر ما طلوعوا فى الإيمان بقوا على رأس الجبل ، فربنا بيقول لك **"أُولَئِكَ"** العالين أوى دول

"عَلَى هُدًى" مستعلين بالإيمان بتاعهم فوق الدنيا وشهوات الدنيا "أُولَئِكَ عَلَى هُدًى" من جهدهم ؟ من مجاهدتهم ؟ من مين ؟ "مَنْ رَبِّهِمْ" كإنا ربنا يقول لك عايز الإيمان ؟ الافتقار ؟ اوعى تفتكر إنك جبتها بشطارتك ، اوعى تفتكر إن الدمعتين اللي بيترلوا من عينك لما بتسمع القرآن بشطارتك ، لأ يا حبيبي ده من عند الله ، يبقى "مَنْ رَبِّهِمْ" دي بتعلمك الافتقار ، اعرف مصدر هدفك عشان تعرف توصل له بسرعة ، مصدر أحلامنا يا جماعة جميعاً من عند الله ، فربنا بيحط لنا الحجة دي في القرآن في النص عشان إيه ؟ عشان نفتكر دايما نطلب الإيمان مين ؟ من الله سبحانه وتعالى "أُولَئِكَ عَلَى هُدًى مِّن رَّبِّهِمْ"

القرآن... الهداية

طيب فيه هنا معنى أنا يعنى مش عايز أعديه لأنه معنى جميل جداً يا جماعة ، ربنا يقول "ذَلِكَ الْكِتَابُ لَا رَيْبَ فِيهِ" هُدًى البقرة : ٢ يبقى القرآن ده إيه ؟ هدى ، هدى لمن يا رب ؟ هدى للمتقين اللي بيصلوا ، واللى بينفقوا واللى بيؤمنون بالكتب والرسول ، واللى بالأخرة موقنين "أُولَئِكَ عَلَى هُدًى" يعنى القرآن هدى للى على هدى ، فيه كلمة الهدى ذكرت مرتين ، يعنى ربنا يقول القرآن هدى ، لمن ؟ للى على هدى ، إزاي يا رب ؟

الهداية نوعين :

يا جماعة فيه هداية إن الإيمان يزل في قلبك : إنك أنت تبدأ تخاف من ربنا ، وتبدأ تحب ربنا ، وتبدأ يبقى امنية حياتك إنك تبقى مع النبي صلى الله عليه وسلم في الجنة ، وتبدأ تكره المعصية وتبدأ يبقى نفسك إن الإيمان في قلبك يزيد ، ده هداية الإيمان ، هداية إن الإيمان يزيد

فيه هداية معرفة الحق من الباطل : هداية معرفة الصبح من الغلط ، يعنى لما تسمع مثلاً إن فيه خلافات ما بين مثلاً بعض الملتزمين وبعض ، طاب يا رب ده الصبح ولا ده ؟ لما تتعرض لفتنة دنيوية والا فتنة أى فتنة من اللى بتمر عليك ، طاب يا رب اعمل فيها إيه ؟! لما تسمع إن في شيعة وفيه صوفية وفيه ، طاب يا رب مين الصبح ؟ يبقى إذن يا جماعة في هدايتين هداية:

١. إنك انت الإيمان ييجي في قلبك

٢. هداية إنك تعرف مراد الله منك : يا رب أنت مرادك مني إيه ؟ إنك تدعوا إلى الله وإنك تتعبد وإنك تعمل إيه ، ومتعملش إيه ، التكليف

يبقى إذا أنت عشان توصل إلى الله محتاج نورين : محتاج نور الإيمان : اللى هيديك هداية الإيمان ومحتاج نور القرآن : اللى هيديك هداية معرفة الصبح من الغلط والحق من الباطل ، يبقى لن تصل إلى الله إلا بنورين نور الإيمان ونور القرآن

نور الإيمان : زى نور عينيك اللي بتشوف بيها ، لازم إنك أنت تشوف به الطريق ، ونور القرآن : زى نور العوايد اللي على جانبي الطريق ، لو حاجة من الأثنين تغيبت مش هتقدر إنك أنت توصل في الطريق ، يبقى لازم نور الإيمان ، نور القرآن ، عشان كدة تلاقي ربنا جاب سورة النور بعد سورة النور سورة إيه ؟ الفرقان ، سورة النور بتتكلم عن نور الإيمان ، وسورة الفرقان بتتكلم عن نور القرآن ، كإنا ربنا يقول لك نور الإيمان ثم نور القرآن تصل إلى الله سبحانه وتعالى ، يعنى لو واحد مؤمن أوى بس مايعرفش حاجة في القرآن يوصل لربنا ؟!!

طاب لو واحد يعنى استاذ تفسير فى جامعة الأزهر ، بس ماعندهوش إيمان ، ما عندهوش خوف من الله يوصل ويعملوا وينجوا من الفتنة ؟ ما يوصلش برضه لربنا ، لازم الإيمان والقراءة يا جماعة ، لازم النورين دول عشان نوصل لله سبحانه وتعالى

قلبان... واحد سليم والثاني فاسد

شوفوا ربنا يقول "كَانَ النَّاسُ أُمَّةً وَاحِدَةً" البقرة : ٢١٣ كله كافر ، ده فى سورة البقرة "كَانَ النَّاسُ أُمَّةً وَاحِدَةً" فَبَعَثَ اللَّهُ النَّبِيِّينَ مُبَشِّرِينَ وَمُنْذِرِينَ وَأَنْزَلَ مَعَهُمُ الْكِتَابَ بِالْحَقِّ لِيَحْكُمَ بَيْنَ النَّاسِ فِي مَا اخْتَلَفُوا فِيهِ" البقرة : ٢١٣ يبقى الناس كلها كفرة ، جه القراءة من عند ربنا عشان الناس تتهدى إلى الله "وَمَا اخْتَلَفَ فِيهِ إِلَّا الَّذِينَ أُوتُوهُ مِنْ بَعْدِ مَا جَاءَتْهُمْ الْبَيِّنَاتُ بَغْيًا بَيْنَهُمْ" البقرة : ٢١٣ يبقى فيه فريق قال لأ رفض الهداية ما اهتدش ، ليه ؟ "بَغْيًا بَيْنَهُمْ" ، "بَغْيًا" يعنى ايه ؟ يعنى عنده مرض فى قلبه ، مرض البغي فى قلبه "فَهَدَى اللَّهُ الَّذِينَ آمَنُوا لِمَا اخْتَلَفُوا فِيهِ مِنَ الْحَقِّ بِإِذْنِهِ" البقرة : ٢١٣

يبقى فيه فريق ما اهتدش لأن قلبه فيه بغي ، وفريق اهتدى لأن قلبه فيه إيمان ، يبقى آدى القراءة نزل أهوه ، وآدى اتنين أهم ، واحد قلبه بايظ وواحد قلبه سليم ، القراءة لما نزل على اللى قلبه بايظ ما نفعهوش بحاجة وفضل ضال ، والقراءة لما نزل على اللى قلبه سليم هدى به إلى الحق ساعة الاختلاف ، يبقى لن تنتفع بالقراءة إلا إن كان عندك الإيمان ، ولن تنتفع بالإيمان إلا إن كان دليلك إلى الله هو القراءة ، الأثنين مع بعض ، عندك إيمان من غير قراءة ما ينفعش ، ما ينفعش تبقى مصلح ، ما ينفعش تبقى مغير ، ما ينفعش إنك أنت تصلح فى الأمة اللى أنت فيها ، ما ينفعش إنك أنت تهدى فى الفتنة ، عندك قراءة من غير إيمان لن يكفى يا جماعة ، لازم الأثنين مع بعض "أُولَئِكَ عَلَىٰ هُدًى مِنْ رَبِّهِمْ وَأُولَئِكَ هُمُ الْمُفْلِحُونَ" البقرة : ٥ جت مرتين ، المرة دي جت مع أهل العبادة أهوه ، والمرة الثانية فى آل عمران "وَلَتَكُنْ مِنْكُمْ أُمَّةٌ يَدْعُونَ إِلَى الْخَيْرِ وَيَأْمُرُونَ بِالْمَعْرُوفِ وَيَنْهَوْنَ عَنِ الْمُنْكَرِ وَأُولَئِكَ هُمُ الْمُفْلِحُونَ" آل عمران : ١٠٤ يبقى الفلاح جه مع أهل العبادة ، الدعوة إلى الله ، اللى هي الوظفتين بتعنا بإذن الله ، يبقى الفلاح جه مع العبادة والدعوة إلى الله

ليه ربنا افتتح القراءة بالسورة دي ؟ بالسورة الجميلة دي ؟

السورة الإيمانية المشرقة دي ؟ عشان يقول لنا هي دي البداية ، عايز تحقق القراءة فى حياتك ؟ هي دي البداية بتاعتك ، لازم توصل للنقطة دي عشان بعد كدة تنطلق إلى الله ، بعد كدة "إِنَّ الَّذِينَ كَفَرُوا سَوَاءٌ عَلَيْهِمْ أُنْذِرْتَهُمْ أَمْ لَمْ تُنْذِرْهُمْ لَا يُؤْمِنُونَ" البقرة : ٦ ياااه بعد ما كانت منورة خالص ، ضلمت خالص ، والعياذ بالله ذكر أهل الظلام "إِنَّ الَّذِينَ كَفَرُوا سَوَاءٌ عَلَيْهِمْ أُنْذِرْتَهُمْ أَمْ لَمْ تُنْذِرْهُمْ لَا يُؤْمِنُونَ" * خَتَمَ اللَّهُ عَلَىٰ قُلُوبِهِمْ وَعَلَىٰ سَمْعِهِمْ وَعَلَىٰ أَبْصَارِهِمْ غِشَاوَةٌ وَلَهُمْ عَذَابٌ عَظِيمٌ" البقرة : ٦ : ٧

من اللغات القرآنية الجميلة أوى فى الآيات دي إن ربنا يقول "إِنَّ الَّذِينَ كَفَرُوا سَوَاءٌ عَلَيْهِمْ" كلنا كنا بنقرأ الآية دي زمان ونقعد نفكر ، يا رب طاب لما هما "سَوَاءٌ عَلَيْهِمْ" دعيناهاهم أو ما دعيناهاهم مش هيؤمنون ، يبقى احنا بدعوا ليه ؟ لما فيه ناس مش هيفرق معها الدعوة ؟ افهم الفرق ما بين سواء عليهم وسواء عليك ، فيه فرق يا جماعة كبير جدا ، "سَوَاءٌ عَلَيْهِمْ" إنما مش سواء عليك أنت ، يعنى ايه ؟

الدعوة تربي الداعي

يعنى لما قال لسيدنا نوح "وَأُوحِيَ إِلَيَّ نُوحٌ أَنَّهُ لَنْ يُؤْمِنَ مِنْ قَوْمِكَ إِلَّا مَنْ قَدْ آمَنَ فَلَا تَبْتَئِسْ بِمَا كَانُوا يَفْعَلُونَ" هود: ٣٦ يا رب يعنى ماعدش حد هيومن ؟ يعنى يا رب أبطل دعوة ؟ طاب يا رب ده أنا آخر واحد أسلم على ايدى ممكن بقالوا ٢٠٠ سنة مثلاً ولا ١٠٠ سنة ، طاب يا رب لما أنت تعلم من ١٠٠ سنة إن محدش هيسلم على ايدى ، أشغل فى الدعوة ليه ؟ لما خلاص ماحدش هيسلم على ايدى ؟

ما هوا يا جماعة لما بنقول يا جماعة اشتغلوا فى الدعوة ، ما بقلش اشتغلوا فى الدعوة عشان الناس بس ، عشان انت تترى ، الدعوة إلى الله هى دعوة للمدعوا وتربية للداعي ، أنت لما بتدعوا إلى الله بتنشط ومقام ربنا ، بيغلى فى قلبك وبتستوى وبتنضج وبتطلع ، والكلام اللى أنت بتقوله بيتأصل فى قلبك ١٠٠ مرة أكثر ما كان فى قلبك قبل ما تقوله ، الدعوة إلى الله بتنشطك ، بتخليك إنسان تانى ، عشان كدة إفضل ادعوا إلى الله ، حتى لو انت اللى قدامك شاكك إن هو ما فيش فيه أمل ، ليه ؟ لأنك انت اللى محتاج الدعوة ، انت اللى محتاج تدعوا عشان انت تترى ، ولو أنت ما دعدش مش هتترى ، سواء عليهم وليس عليك ، أنت محتاج الدعوة تفضل فيها "سَوَاءٌ عَلَيْهِمْ أُنذِرْتَهُمْ أَمْ لَمْ تُنذِرْهُمْ لَا يُؤْمِنُونَ" * خَتَمَ اللَّهُ عَلَى قُلُوبِهِمْ وَعَلَى سَمْعِهِمْ وَعَلَى أَبْصَارِهِمْ غِشَاوَةٌ وَلَهُمْ عَذَابٌ عَظِيمٌ " البقرة : ٧ الفرق بين عذاب أليم ...عذاب عظيم ...عذاب مهين ...عذاب شديد

ربنا هبدأ بعدها آيات المنافقين هيقول "وَمِنَ النَّاسِ مَنْ يَقُولُ آمَنَّا بِاللَّهِ وَالْيَوْمِ الْآخِرِ وَمَا هُمْ بِمُؤْمِنِينَ" * يُخَادِعُونَ اللَّهَ وَالَّذِينَ آمَنُوا وَمَا يُخَادِعُونَ إِلَّا أَنْفُسَهُمْ وَمَا يَشْعُرُونَ * فِي قُلُوبِهِمْ مَرَضٌ فَزَادَهُمُ اللَّهُ مَرَضًا وَلَهُمْ عَذَابٌ أَلِيمٌ بِمَا كَانُوا يَكْذِبُونَ " البقرة ٨ : ١٠ يبقى مع الكفار ربنا قال لهم عذاب عظيم ، مع المنافقين ربنا قال لهم عذاب أليم ، ليه ؟ ايه الفرق بين عظيم وأليم ؟

العذاب العظيم : اللى بينفذ لعظم الإنسان من شدة قوته ، العذاب اللى هو بيحرق اللحم وبينفذ من العظم والعياذ بالله ، يبقى إذن عظيم يعنى كميته كبيرة ، عذاب كبير أوى فى الكم **إنما أليم :** يا جماعة مش الكم اللى كبير ده الكيف اللى كبير ، يعنى ايه ؟ يعنى أنا ممكن واحد يعذب واحد يعنى ممكن واحد يجيب مثلاً مطرقة حديد ويتزل على واحد يدشدش له عظمه فيها يبقى ده عذاب عظيم ، ليه ؟ لأنه عذاب كبير ، وممكن يجيب سلك كهربا كده صغير خالص ، بس ويقوم عامل له كده فى ايده ، يعمل فيه ايه ؟ ينفضه ، ليه ؟ عذاب أليم ، هو بس نقطة منه بس نفضه بيه

يبقى الفرق بين العذاب العظيم والعذاب الأليم إن العذاب العظيم صفة للكم بتاع العذاب ، العذاب الأليم صفة للكيف ، ليه ؟ الجزء من جنس العمل ، الكافر كان ذنبه عظيم ، ذنب كبير ، ليه ؟ واحد بيقول مافيش إله ، أو فى هبل أو واللاتى والعزة إله ، ذنب عظيم ، يبقى ياخذ عذاب عظيم

إنما المنافق لأ ، المنافق ده يا جماعة ماكنش بيعمل حاجات كتير ، المنافق ده عبد الله بن أبى بن سلول يبقى واقف فى المدينة ، يلاقى السيدة عائشة داخلة وأحد الصحابة صفوان بن المعطر مدخلها المدينة قائدها إلى المدينة يقول إيه ده ؟! امرأة نبيكم باتت مع رجل غريب ، إنه ما هو إلا أن نال منها أو نالت منه ، كلمة صغيرة أد كدة أهوه ولكن قلب بيها المجتمع المدنى كله ، خلى كبار الصحابه يلفوا حوالين أنفسهم شهر ، كلمة ، فهو ده المنافق ، المنافق يدخل

في وقت معين يؤرّص أُرصة بس تخلى المجتمع يتزلزل بسببها ، فربنا كأنه يقول له أنت عملت ذنوب كيفية مش كمية ، أنا هعذبك عذاب كيف مش كم أنا هدوقك العذاب ، عشان كدة تلاقي ربنا يجيب في القراءان عذاب عظيم وعذاب أليم وعذاب مهين وعذاب شديد

العذاب العظيم : اللى من شدته بينفذ للعظم يعنى عذاب كمه كبير ، **العذاب الأليم** : بيحيى مع المنافقين كثير لما الآية تبقى مع المنافقين اللى هو العذاب اللى كيفه كبير ، **العذاب المهين** : اللى هو الهذاب النفسى زى "**ذُقْ إِنَّكَ أَنْتَ الْعَزِيزُ الْكَرِيمُ**" الدخان : ٤٩ **العذاب الشديد** : اللى شد بعضه إلى بعض ، يعنى صنف عذاب وراه صنف عذاب ، عذاب ورا عذاب ، بحيث إن الكافر والعياذ بالله يبقى مش ملاحق على ألوان العذاب ، ولا في لحظة راحة ، ما بين كل عذاب والثاني عذاب شد بعضه إلى بعض ، فلا يجد منفذ من وسط كل صنوف العذاب إن هوه ينفذ إلى الله ، إن هوه ينفذ إلى أى نجاة والعياذ بالله

بندخل في آيات المنافقين

يا جماعة وآيات المنافقين دي قهمننا جدا ، قهمننا جدا ليه ؟ قهمننا جدا عشان ثلاث حاجات :

١. إن الوصف الأولانى للمنافقين ده وصف للعلمانيين بتوع اليومين دول ، لما ربنا يقول "**وَمِنَ النَّاسِ مَن يَقُولُ آمَنَّا بِاللَّهِ وَبِالْيَوْمِ الْآخِرِ وَمَا هُمْ بِمُؤْمِنِينَ**" البقرة : ٨ زى اسمه إيه ده اللى كانوا عملوا عليه قضية ده ، وهرب وساب البلد لما كتب أننى أوّمن بالله والرسول ، لما اتعمل عليه قضية تفريق بينه وبين زوجه كان اسمه ايه ؟ نصر أبو زيد ، ورجع بعدها زعل جدا إزاي يتكتب عنى إني أنا أوّمن بالله وبرسوله !!! زعلان جدا !!! بس بعد كدة سافر برة ، **يعنى هيا اتكتبته عشان يعرف يطلع** ، هو بيقول لكن أنا مؤمن ولكنه كافر والعياذ بالله ولكنه بيطن كفر فظيع

"وَمِنَ النَّاسِ مَن يَقُولُ آمَنَّا بِاللَّهِ وَبِالْيَوْمِ الْآخِرِ وَمَا هُمْ بِمُؤْمِنِينَ * يُخَادِعُونَ اللَّهَ وَالَّذِينَ آمَنُوا" البقرة ٨ : ٩
انت بتضحك على مين ؟ أنت بتضحك على ربنا ؟! "**وَمَا يَخْدَعُونَ إِلَّا أَنْفُسَهُمْ وَمَا يَشْعُرُونَ * فِي قُلُوبِهِمْ مَرَضٌ فَزَادَهُمُ اللَّهُ مَرَضًا وَلَهُمْ عَذَابٌ أَلِيمٌ بِمَا كَانُوا يَكْذِبُونَ * وَإِذَا قِيلَ لَهُمْ لَا تُفْسِدُوا فِي الْأَرْضِ قَالُوا إِنَّمَا نَحْنُ مُصْلِحُونَ**" البقرة ٩ : ١١ ده احنا اللى عايزين اصلاح التعليم ، وعايزين اصلاح وضع المرأة ، وعايزين اصلاح النظام السياسى والاقتصادى ، وعايزين اصلاح المعاملات وعايزين اصلاح الجامعة

احنا بتوع الإصلاح !!! ده احنا اللى عايزين نخرج المرأة من البيت عشان الإصلاح !!! وعايزين الشباب يقفوا مع البنات !!! وكل حاجة كدة تبقى مع بعضها عشان الإصلاح !!! وعايزين البنات يعملوا في نفسهم البدع عشان الإصلاح !!! كله عشان الإصلاح يا جماعة "**قَالُوا إِنَّمَا نَحْنُ مُصْلِحُونَ**" ديما كده تلاقيهم عايشين في الدور أوى احنا اللى هنصلح الكون "**أَلَا إِنَّهُمْ هُمُ الْمُفْسِدُونَ وَلَكِن لَّا يَشْعُرُونَ * وَإِذَا قِيلَ لَهُمْ آمِنُوا كَمَا آمَنَ النَّاسُ قَالُوا أَنُؤْمِنُ كَمَا آمَنَ السُّفَهَاءُ ۗ أَلَا إِنَّهُمْ هُمُ السُّفَهَاءُ وَلَكِن لَّا يَعْلَمُونَ**" البقرة ١٢ : ١٣

احنا هنعمل زى بتوع العشويّيات ، ده هما من عشر سنين الحجة دي بطلت الحمد لله ، الحمد لله ، يعنى عاد شباب الجامعة هما أكبر طائفة في الإلتزام أصلا ، وعاد يعنى نسبة الإلتزام في الطوائف العليا في المجتمع من ناحية المجتمع ومن ناحية المراكز أعلى كمان من الطبقات اللى منها ، بس كان من عشر سنين الكلمة اللى الواحد التزم عليها دائما

شباب العشوائيات السبب في التيار الإرهابي ، هوا العشوائيات ، لو زلنا العشوائيات الإرهاب هيروح ، أهوه الإرهاب خرج لهم أهوه ، من حيث لا يحتسبون !

"وَإِذَا قِيلَ لَهُمْ آمِنُوا كَمَا آمَنَ النَّاسُ قَالُوا أَنُؤْمِنُ كَمَا آمَنَ السُّفَهَاءُ ۗ أَلَا إِنَّهُمْ هُمُ السُّفَهَاءُ وَلَكِنْ لَا يَعْلَمُونَ"

زى اللى مش لاقين يكلوا دول الشباب الفقرا ده ، ده البنت اللى بتغطى شعرها دي معهاش قمن الكوافير أصلا فهى عشان معهاش قمن الكوافير بتغطى شعرها بس مش أكثر !!! ده الولد اللى مش عارف إيه ده هو بس عنده عقده نفسية ، عقدة نقص ، فمش عارف يدخل وسط صحابه عشان مايبقاش عنده نقص وسطهم ، لما يجوا يعزموا بعض ويخرجوا مع بعض وهو ماعهوش فلوس يخرج معاهم !!! **هوه ده الكلام اللى بيقلوه ولكن أبطل الله كل مكائدهم الحمد لله**

الإفساد في الأرض ... عدم الإيمان

"وَإِذَا قِيلَ لَهُمْ آمِنُوا كَمَا آمَنَ النَّاسُ قَالُوا أَنُؤْمِنُ كَمَا آمَنَ السُّفَهَاءُ ۗ أَلَا إِنَّهُمْ هُمُ السُّفَهَاءُ وَلَكِنْ لَا يَعْلَمُونَ"

البقرة : ١٣ له يا جماعة مع **"لَا تُفْسِدُوا فِي الْأَرْضِ"** ربنا قال **"أَلَا إِنَّهُمْ هُمُ الْمُفْسِدُونَ وَلَكِنْ لَا يَشْعُرُونَ"**

البقرة : ١٢ ومع عدم الإيمان قال **"أَلَا إِنَّهُمْ هُمُ السُّفَهَاءُ وَلَكِنْ لَا يَعْلَمُونَ"** البقرة : ١٣ له مع الإفساد جاب **"لَا يَشْعُرُونَ"** ومع عدم الإيمان جاب **"لَا يَعْلَمُونَ" ؟**

لما يكون واحد مننا له أخ في البيت حياته هرجله ، يعنى مش منظم ، يعنى ياكل الأكل وتلاقه عك الحطة حواليه ، يوقع أى طبق في أى مكان ، يرمى الهدوم في كل حطة ، الأوضه بتاعته منظرها لا يطاق ، أهله في البيت يقولوا له ايه أنت ما بتحسش على دمك ؟ **دايما المفسد ماعندهوش دم ، ما بيعسش ، عشان كدة مع الإفساد ربنا جاب "لَا يَشْعُرُونَ" ما عندهمش دم**

إنما الإيمان علم بيترله الله في قلب المؤمن ، عشان كدة مع عدم الإيمان نفى العلم لأن الإيمان هو العلم

"وَإِذَا لَقُوا الَّذِينَ آمَنُوا قَالُوا آمَنَّا وَإِذَا خَلَوْا إِلَىٰ شَيَاطِينِهِمْ" البقرة : ١٤ اللى هم اليهود ، اللى هم سر افساد

العلمانيين ، وسر افساد النصارى ، وسر افساد بوش ، وسر افساد العالم كله ، يعنى اليهود دول هما اللى ورا كل مصيبة في العالم العالم **"وَإِذَا خَلَوْا إِلَىٰ شَيَاطِينِهِمْ" اللى هما اليهود "قَالُوا إِنَّا مَعَكُمْ إِنَّمَا نَحْنُ مُسْتَهْزِئُونَ * اللَّهُ يَسْتَهْزِئُ بِهِمْ وَيَمْدُدُهُمْ فِي طُغْيَانِهِمْ يَعْمَهُونَ * أُولَٰئِكَ الَّذِينَ اشْتَرَوُا الضَّلَالَةَ بِالْهُدَىٰ فَمَا رَبَحَتِ تِجَارَتُهُمْ وَمَا كَانُوا مُهْتَدِينَ"**

البقرة : ١٤ : ١٦

الآية دي لما تسمعها للأسف يا جماعة ، تفتكر بعض الشباب ، يعنى الشباب بيصلى التراويح في الجامع ، وهوه قاعد في القهوة ، الشباب بيصلى التهجد في الجامع وهوه قاعد في النادي **"أُولَٰئِكَ الَّذِينَ اشْتَرَوُا الضَّلَالَةَ بِالْهُدَىٰ"** الهدى صريح أهوه ، لأ هوه عاوز القهوة ، الهدى التهجد أهوه ، لأ هوه عايز النادي ، الهدى إن الناس في صلاة الظهر قاعدة في الجامع يا ابني بتقرأ قرآن ، لأ هوه واقف مع فلانه وهى واقفه مع فلان **"اشْتَرَوُا الضَّلَالَةَ بِالْهُدَىٰ فَمَا رَبَحَتِ تِجَارَتُهُمْ"** البقرة : ١٦ يبقى الدنيا ضاعت ماخدوش حاجة في الدنيا **"وَمَا كَانُوا مُهْتَدِينَ"** ولا خدوا حاجة في الدين ، يعنى **ضيعوا الدنيا وضيعوا الدين** ، وربنا جاب ضياع الدنيا قبل ضياع الدين عشان كأنه يقول لك إن

أول حاجة بيخسرهما اللي بيشتروا الضلالة بالهدى الدنيا ، أول حاجة اللي هي الحاجة اللي هو خسر ربنا عشانها
- اللي هي الدنيا - هي أول حاجة ربنا بيخليه يخسرها ، الجزاء من جنس العمل
أهل الانتكاس !!!... عافانا الله وإياكم

"مَثَلُهُمْ" المثلين دول ، يبقى النقطة الأولانية ، التلت الأولانى فى آية المنافقين العلمانيين ، التلتين التانيين يا جماعة
احنا ، ربنا يعافينا يا رب "مَثَلُهُمْ كَمَثَلِ الَّذِي اسْتَوْقَدَ نَارًا" البقرة : ١٧ واحد عايز نار ، يولع نار عشان يشوف ،
وتنور له ، يعنى الصحرا مضلمة عايز نار تنور "كَمَثَلِ الَّذِي اسْتَوْقَدَ" واللى بيستوقد النار ده بيعمل إيه ؟
بيروح يجمع حطة حطب من هنا ، ويمشى كيلوا عشان يجيب حطة خشب من هنا ، ويمشى كيلوا هنا عشان يجيب
حطة خشب ، بيتعب على ما يلحم خشب يولع النار ، يبقى واحد قاعد يلحم حطب لغاية ما لم ، وبعد كدة ولع نار
"كَمَثَلِ الَّذِي اسْتَوْقَدَ نَارًا فَلَمَّا أَضَاءَتْ مَا حَوْلَهُ" الحطة بقت نور أهى ، خلاص الحطة نورت أهى "ذَهَبَ اللَّهُ
بُنُورِهِمْ" فجأة كل حاجة اطفئت "وَتَرَكَهُمْ فِي ظُلُمَاتٍ لَا يُبْصِرُونَ" صُمْ بَكُمْ عُمِّي فَهُمْ لَا يَرْجِعُونَ" البقرة : ١٧

تخيل واحد قاعد فى أوضة ضلمة ، أعمى ما بيشفش ، ماهواش عارف الباب اللي يخرج منه منين ، أبكم ما بيقدروش
ينطق عايز ينادى يقول يا جماعة حد يلحقنى مش قادر ، حد يلحقنى ، أصم ما يسمعش لو واحد من برة قال
الطريق من الناحية الفلانية ، أو اخرج من الناحية الفلانية مش هيسمع ، عشان كده ربنا قال فى الآخر "فَهُمْ لَا
يَرْجِعُونَ" دول انتهوا

ده مثل لمن يا جماعة ؟ ربنا يعافينا يا رب ، ده مثل يعنى بينطبق على ناس كثير جدا ، يعنى من المنافقين والعياذ بالله ،
ولكن بردضه بينطبق على المنتكسين ، على أهل الانتكاس على اللي التزم ، على اللي استوقد نار ، اللي جه فترة
من الفترات قعد يجمع حطبة من هنا يجمع درس من هنا ويحضر درس فى التوحيد ، ويروح يسمع شريط ويروح
يقرأ قرآن ، ويروح يصاحب الصحبة الملتزمة لغاية ما بقى فى نار نورت له طريق إلى الله "أَضَاءَتْ مَا حَوْلَهُ" بقت
الحطة مضئية ، بس ما حوله ، ما بداخله لسه من جواه ضلمة ، لسه النور ما دخلش ، طاب ولما أضاءت "ذَهَبَ اللَّهُ
بُنُورِهِمْ" ليه ؟

هو المنافقين ليه بعد ما النور جه ، ربنا أذهب النور ؟ لأنه قعد عند النبى صلى الله عليه وسلم سمع كلمتين عن ربنا
النور جه ، خرج من عند النبى بدل ما يروح على بيته يصلى ويقوم الليل روح على فين ؟ على عبد الله بن أبى بن
سلول ، اليهود ، سمع منهم الشبهات دخلت فى قلبه كفر والعياذ بالله
بعد ما الشاب يدخل الجامع ويسمع كلام ربنا ، ويسمع كلام الإيمان ويصلى الصلاة ورا إمام يقرأ بآيات الآخرة
ويلاقى اللي على يمينه بيعيط واللى على شماله بيعيط ، يخرج بدل ما يروح بيته يسمع شريط ولا يصلى ، يقوم رايح
قاعد مع الشلة القديمة تانى ، يرجع تانى كما هو والعياذ بالله يرجع ، اللي بيرجع يا جماعة بتبقى الأفلة بتاعته من الدين
أشد من الأفلة بتاعة اللي مادخلش أصلا ، خدوا بالك ربنا يعافينا من هذا الوضع يا رب
"فَلَمَّا أَضَاءَتْ مَا حَوْلَهُ" كانت فرصة عمره ، ده يوم القيامة هيعمل إيه ؟ ده لما يلاقى إن كان فى فرصة قدامة يدخل
الجنة وبعد كده هيدخل جهنم بسبب هذا الإنتكاس

"فَلَمَّا أَضَاءَتْ مَا حَوْلَهُ ذَهَبَ اللَّهُ بِنُورِهِمْ وَتَرَكَهُمْ" حاجة صعبة أوى "وَتَرَكَهُمْ" تخيل لو ربنا تركك ، يعنى الواحد ساعات يستعجب من الكلمة اللى بعد كلمة "تَرَكَهُمْ" ربنا يقول "وَتَرَكَهُمْ" إيه ؟ "فِي ظُلُمَاتٍ" يا رب أنت لو تركتهم فى أنوار هيضيعوا ، أنت لو تركك ربنا ، لو تركك وانت معاك أسباب الدنيا كلها هتعمل إيه ؟ هتضيع ، يبقى يا رب أنت لو تركتهم فى أنوار لضاعوا ، فما بالك يان ربنا "وَتَرَكَهُمْ" فى ظلمات ، فى فتن وراء فتن ، ومدهمات وراء مدهمات ، بعيد عن الله سبحانه وتعالى ، فكلمة "وَتَرَكَهُمْ" يعنى إيه ؟ يعنى انسى "إن معى ربي سيهدين" ماعدش فيه يا جماعة "إن معى ربي سيهدين" ، انسى "لا تحزن إن الله معنا" كل فتوح معية الله وتوفيق الله ، وفرج الله ونصرة الله ، وحفظ الله وهداية الله ، كل ده اتحرم منهم والعياذ بالله ، يبقى نخاف من ده ولا منحافش ؟ ده المثل الأولانى ، ده اللى ضاع ، فى مثل تانى ده اللى أقرب لينا بقى يا جماعة "أَوْ كَصَيْبٍ مِنَ السَّمَاءِ فِيهِ ظُلُمَاتٌ وَرَعْدٌ وَبَرْقٌ يَجْعَلُونَ أَصَابِعَهُمْ فِي آذَانِهِمْ مِنَ الصَّوَاعِقِ حَذَرَ الْمَوْتِ وَاللَّهُ مُحِيطٌ بِالْكَافِرِينَ" البقرة : ١٩ المتذبذب !!!...التائه !!!

المنافقين نوعين : نوع انتهى الأمل فيه خلاص كفر ارتد ، ونوع اللى هوه بقى كثير مننا للأسف ، هيلاقى فيه ملامح متشابهة شوية مع النموذج ده "أَوْ كَصَيْبٍ مِنَ السَّمَاءِ" وابل مطر نزل من السما "فِيهِ ظُلُمَاتٌ وَرَعْدٌ وَبَرْقٌ" المنافق لما يترل القراءان ، لما يسمع القراءان ، هوه عنده شبهات فيها ، يلاقى الدنيا ضلمت والرعده لما يسمع صوته يترعب ، لما يسمع آيات الوعيد والتهديد بالنار يترعب "وَرَعْدٌ" ، "وَبَرْقٌ" آيات فيها نور ، الآيات من عند ربنا ، وآيات فيها اعجاز للقراءان يبدأ النور يجي تانى يبدأ ، يقول ده باين أنا ماشى غلط ، وباين أنا لازم أرجع ، إنسان متذبذب إنسان متردد إنسان ، مهواش عايش حياة مستقرة

"أَوْ كَصَيْبٍ مِنَ السَّمَاءِ فِيهِ ظُلُمَاتٌ وَرَعْدٌ وَبَرْقٌ يَجْعَلُونَ أَصَابِعَهُمْ فِي آذَانِهِمْ مِنَ الصَّوَاعِقِ حَذَرَ الْمَوْتِ" البقرة : ١٩ النوع اللى قبله كان ربنا يقول "صُمُّ" ، "صُمُّ" مايسمعش ، إنما ده لسه يسمع أهوه ، يبقى ده غير ده "أَوْ كَصَيْبٍ مِنَ السَّمَاءِ فِيهِ ظُلُمَاتٌ وَرَعْدٌ وَبَرْقٌ يَجْعَلُونَ أَصَابِعَهُمْ فِي آذَانِهِمْ مِنَ الصَّوَاعِقِ حَذَرَ الْمَوْتِ" البقرة : ١٩ يبقى لسه يشوف ، النوع اللى قبله ربنا قال عليه ايه ؟ "عُمِّي" يبقى ده غير ده يا جماعة

"يَكَاذُ الْبَرْقُ" ده اللى لسه واقف فى النص ، ده المتذبذب ، ده اللى يسمع شوية كلام عن الدين والإيمان ، أه هوه ده الصح ولازم ، يخرج برة يشوف الفتن لأ مش قادر وما أقدرش أبعد ، ده المتذبذب اللى مهواش عارف ياخذ قرار إن هو يتجهه إلى الله ويخلص دينه الله

"يَكَاذُ الْبَرْقُ يَخْطَفُ أَبْصَارَهُمْ كُلَّمَا أَضَاءَ لَهُمْ مَشَوْا فِيهِ" النور يجي ، شوية يمشى ، ويجي الجامع وتلاقى ما شاء الله منطلق إلى الله زى الصاروخ "وَإِذَا أَظْلَمَ عَلَيْهِمْ قَامُوا" أى وقفوا متحيرين لا يدرون إلى أين يذهبون ، يبقى شوية نور وشوية ضلمة فلاشات يعنى ، أهوه هوا ده مثل ناس كثير مننا ، تلاقى شوية الشاب ما شاء الله تدخل الجامع فى أى وقت تلاقىه ماسك المصحف وقاعد يقرأ ، وتلاقى ما شاء الله السنة القبلية والسنة البعدية والاجتهاد والخشوع والدروس ، والشرايط والصحبة والجرى وصنائع المعروف تلاقى ما شاء الله ، والدعوة إلى الله ما شاء الله تترل الجامعة تلاقىه قاعد يكلم ده ويكلم ده ، ويفوت على ده ويدعوا ده وبأخذ ده معاه الظهر ، مجتهد أشد الاجتهاد ، وشوية فجأة تلاقى الأخ جى لك عينيه زايفة وتابيه ، ويقول لك أنا تايه وأنا مش عارف إيه ،

وتلاقيه ساب الدعوة وتلاقيه قاعد في الدرس ثلاث أربع الدرس ماهواش سامع منه حاجة أصلا ، لأن هوه تايهه عن الدرس في المهموم بتاعته ، فتن بالدنيا ، فتن بمشاكل الدنيا

كان الأول فيه نور مخلى أغلى حاجة عنده ربنا ، شوية فتنة الدنيا تيجي ، الخوف على الدنيا ، لأ الدراسة تتأثر ، لأ الدين ، لأ معرفش هيحصل لي إيه ، تلاقي فتنة الدنيا جت ، ضلعة الدنيا عليه تاني ، الذبذبه ، البرزوى يقول في تفسيره **"وكذلك"** في الذبذبه **"حال المتمنين"** اسمعوا الكلمة دي كويس أوى وركزوا فيها أوى ، **"وكذلك"** الكلمة دي والله يا جماعة ليها ذكرى جامدة أوى معايا ، الكلمة دي أذكر إن فيه مرة كان عندى امتحان ، وكان امتحان مهم يعنى في الكلية في السنين الأخرانية ، وطلعت بعد الفجر حاسس بحالة يا رب الدين بيضيع ، الدين بتقطع وأنا هتجنن يعنى أنا المعقول أقعد الشهرين بتوع الامتحانات ما أديش كلمة حتى في مسجد أدعوه إلى الله ، لو واحد احتاجني في دعوة إلى الله ما أنزهوش؟! ما حفظش على أوراد العبادة ، يعنى الواحد مش قادر يستوعب إن جهد الدين ممكن يتوقف لأى سبب من الأسباب ، فطلعت من صلاة الفجر وأنا في حالة ما يعلم بيها إلا الله ، فلقيت الكتاب ده محطوت قدامى على الرف ، قمت فاتحه كده شفته وقدمت ، فاتحه لقيت الكلمة دي في وشي **"وكذلك حال المتمنين الذين يدعون الإرادة ، ولا يخرجون عن العادة"** هترجمها لكم دلوقتي **"ويريدون الجمع بين مقاصد الدارين حتي يتجاوزوا في الدنيا حد الإحتياج إليها"** البرزوى يقول إن الذبذبة بتاعة المنافقين ده مش المنافقين بس اللي عايشين فيها ، ده في ناس مننا عايشة فيها

"وكذلك حال المتمنين" أنا نفسى أبقي داعية إلى الله ، أنا نفسى أكسر الدنيا ، أنا نفسى شلتي كلها تلتزم على إيدى ، أنا نفسى أبقي بطل ، أنا نفسى أبقي جبل قاعد يتمنى **"الذين يدعون الإرادة"** بيدعى إنه يريد ربنا ، بيدعى إنه عايز ربنا **"ولا يخرجون عن العادة"** عايز الفتوحات تتزل عليه وهو نايم كدة ، لا يا حبيب قلبي لازم ليالك يبقى خلاف ليل صحابك ، هيناموا طول الليل أنت تصحى تقوم الليل ، لازم تبقى حياتك غير الناس ، انت عايز فتوحات ؟ ما بتفتحش غير على الخواص ، يبقى لازم تتصرف تصرفات الخواص

لازم تبقى حياتك جد ، لازم تبقى راجل ، لازم تبقى من أهل المجاهدة **"الذين يدعون الإرادة ولا يخرجون عن العادة"** زيهم زى غيرهم عايشين حياتهم زى غيرهم **"ويريدون الجمع بين مقاصد الدارين"** عايز يبقى القمة في الأثنين أنت عايز تبقى القمة في الأثنين ؟ ماشى ولكن إن أردت الدين بصدق ربنا هيديك الدنيا ، ولكن لو شئت همك ما بين الأثنين هتنحسر الأثنين **"ويريدون الجمع بين مقاصد الدارين حتي يتجاوزوا في الدنيا حد الإحتياج إليها"** نريد طريق الله أن يكون اختيارنا الوحيد

النقطة اللي احنا عايزين بس نفهمها من الكلمة أو من مسألة الذبذبه ، مش عايزين نبقي مذبذبين يا جماعة ، عايزين يبقى طريق الله اختيارنا الوحيد واختيارنا النهائى ، عايزين نبقي رجالة ، عايزين نفوسنا ما تضعفش لما تيجي ده الدراسة ده لو اشتغلت في الدعوة ، يا ابني لو اشتغلت في الدعوة هتذاكر أضعاف ما كنت هتذاكر من غير الدعوة ما أنت بقالك عشر سنين أهوه عملت إيه يعنى؟! ما بتذكرش أصلا يعنى الله سبحانه وتعالى من شكره لهدايتك إنه يفتح نفسك للمذاكرة ، ويفتح نفسك للدنيا ، ويوجب لك الدنيا راغمة ، المقصد يا جماعة إن احنا مش عايزين نبقي هذا النوع

"كَلِمًا أَضَاءَ لَهُمْ مَشَوْا فِيهِ وَإِذَا أَظْلَمَ عَلَيْهِمْ قَامُوا" وَلَوْ شَاءَ اللَّهُ لَذَهَبَ بِسَمْعِهِمْ وَأَبْصَارِهِمْ" البقرة : ٢٠ تهديد ربنا بيهددنا ، لسه سايب لك سمعك وبصرك ، إنما لو فضلت عايش في التوهان اللي أنت عايش فيه ده ، هأخذ منك سمعك وبصرك وهسيبك زى التايهين اللي برة ، احذر إن نعم ربنا اللي أعطاهها لك ، هو أعطاهها لك لسة ، احذر إنك تستكبر عليها ، أو إنك أنت تتجاهلها ، أو إنك تفضل تايهه تتحرم منها والعياذ بالله "وَلَوْ شَاءَ اللَّهُ لَذَهَبَ بِسَمْعِهِمْ وَأَبْصَارِهِمْ إِنَّ اللَّهَ عَلَى كُلِّ شَيْءٍ قَدِيرٌ" البقرة : ٢٠ يا جماعة احنا مش شرط نخلص الدرس كله ، ليه ؟ لأن احنا عاملين دلوقتي زى اللي نزل في محيط ، والمحيط ملايين الأسماك رايحة ، وملايين الأسماك جاية واحنا هنعد ساعة واحدة بس فاحنا هنقدر نصداد كام سمكة ؟ يعنى احنا يادوبك هنقدر شوية صغيرين كدة ، الجزء لسة طويل ، أنا عايز بس أقول لكم بسرعة كدة في ثواني خدوا بالكم يا جماعة ، بعد كده هتدخل على آيات آيات المنافقين ، هتدخل بعد كدة

آيات سيدنا آدم

خدوا بالكم في آيات سيدنا آدم أوى يا جماعة ، أوى من إن ابليس اللي ضيعه ، إنه عبد ربنا عشان الدنيا ، عبد ربنا عشان ربنا يجعله هو الخليفة ، عبد ربنا عشان ربنا يرفعه ، فلما قال له اسجد قال لأ ، اوعى تعبد ربنا عشان دنيا اعبد الله من أجل الله ، إن ربنا اعطاك الدنيا يبقى كرم من عنده ، اوعوا تاني حاجة ابليس نظر إلى الأمر ولم ينظر إلى الأمر ، ربنا قال له اسجد ، قال اسجد ليه ؟ انت بتبص للأمر !!! بص للأمر بس ، للى أمرك ، سيدنا آدم يا جماعة افتكروا تكريم ربنا لينا باللى عمله في سيدنا آدم شوفوا ربنا يقول "وَإِذْ قَالَ رَبُّكَ لِلْمَلَائِكَةِ إِنِّي جَاعِلٌ فِي الْأَرْضِ خَلِيفَةً قَالُوا أَتَجْعَلُ فِيهَا مَنْ يُفْسِدُ فِيهَا وَيَسْفِكُ الدِّمَاءَ وَنَحْنُ نُسَبِّحُ بِحَمْدِكَ وَنُقَدِّسُ لَكَ قَالَ إِنِّي أَعْلَمُ مَا لَا تَعْلَمُونَ * وَعَلَّمَ آدَمَ الْأَسْمَاءَ كُلَّهَا ثُمَّ عَرَضَهُمْ عَلَى الْمَلَائِكَةِ" البقرة ٣٠ : ٣١ وبعد كدة عرض الأسماء دي كلها على الملائكة "فَقَالَ أَتُبْونِي بِأَسْمَاءِ هَؤُلَاءِ إِنْ كُنْتُمْ صَادِقِينَ * قَالُوا سُبْحَانَكَ لَا عِلْمَ لَنَا إِلَّا مَا عَلَّمْتَنَا إِنَّكَ أَنْتَ الْعَلِيمُ الْحَكِيمُ * قَالَ يَا آدَمُ أَنْبِئْهُمْ بِأَسْمَائِهِمْ" البقرة ٣١ : ٣٣

أنا عايزك صدرك ده يتنفخ كده وأنت بتسمع كلمة "يا آدم أنبئهم بأسمائهم" ، ليه ؟ تخيلوا كدة مثلا محمد مثلا طول ما أنا بشرح إنت فاهم يا محمد ؟ يقول لى آه فاهم ، بعد شوية يا محمد إنت مركز في الكلام ده ؟ آه مركز ، بعد شوية محمد أعيد تاني الشرح ؟ لا لا ماتعدش الشرح تاني ، يا محمد إنت ؟ آه كويس ، فكلكم في الآخر تقولوا إيه ؟ هو إيه حكاية محمد ؟ يعنى هو مافيش حد قاعد قدامه غير محمد ولا إيه ؟ لأ ده احنا كمان ، لازم إبراهيم ، لازم الأسماء دي كلها تطلع هيا كمان ، فأقوم عشان أقول لكم اشعنى محمد ، أقوم آجى في النص أقول لكم إيه يا جماعة ؟ أنا هسألکم سؤال وأقوم جايب سؤال فقهي صعب جدا ، وأقوم حاطهلكم ، قوم يا فلان يقف ويبص كدة مش عارف حاجة ، قوم يا فلان يقف ويبص كدة مش فاهم حاجة ، قوم قوم قوم كله مش عارف ، قوم يا محمد حل السؤال ، يقوم محمد يدى إجابة نموذجية رائعة للسؤال ، أقوم أقول لكم إيه ؟ ألم أقل لكم عشان تعرفوا إن أنا حكيم ، إن أنا ما بختارش محمد من وسط الناس إلا عشان حكمة ، والله المثل الأعلى

"يَا آدَمُ" ما هم يقولوا ليه آدم ؟ ليه مش احنا "يَا آدَمُ أَتَيْتُهُمْ بِأَسْمَائِهِمْ فَلَمَّا أَنْبَأَهُمْ بِأَسْمَائِهِمْ قَالَ أَلَمْ أَقُلْ لَكُمْ"

البقرة : ٣٣ أهى ألم أقل لكم دي وظيفتنا يا جماعة ؟ ألم أقل لكم دي وظيفتنا ، وظيفتنا إن احنا نبقي حجة على الخلق جميعا لله ، وظيفتنا إن لما حد يطلع علينا يقول سبحانه فعلا يارب أنت حكيم إنك نزلت الناس دي الأرض ، إنما دلوقتي اللي هيطلع على الجامعة هيقول يا رب **"أَتَجْعَلُ فِيهَا مَنْ يُفْسِدُ فِيهَا"** ولا هيقول له ربنا **"أَلَمْ أَقُلْ لَكُمْ"** تخيلوا هيقال إيه ؟ يعنى إحنا حاجة تكسف والله يا جماعة ، احنا حاجة تكسف فعلا ، عشان كدة عارفين ليه ربنا بيباهى بالعبد الملائكة لما ينام فى قيام الليل ، ما هي دي الفكرة يجب الملائكة تقول هتزله ليه الأرض ؟ شوفوا من كثر حبه فيا ، وتغافيه فى عبادتى نام وهو بيعبدنى ، من كثر إصراره على إنه يعبدنى ، فيقوم ربنا بيباهى بك الملائكة ويقول لهم **"أَلَمْ أَقُلْ لَكُمْ"** ليه ؟ عشان انت بقيت فى هذه اللحظة حجة لله على الخلق

آيات بني إسرائيل

عايزين وإحنا بنقرأها نتخنيق من بنى إسرائيل ، نتخنيق من الجرائم اللي هما عملوها فى حق الله ، وعايزين وإحنا بنسمعها نشوف يا جماعة عاقبة اللي بيعصى ربنا إيه ، الناس دي ربنا رفعهم لدرجة ما رفعش فيها حد من العالمين ، ولما عصوا ربنا ذلهم فى الأرض

وفي قصة سيدنا إبراهيم

بعد كده فى قصة سيدنا إبراهيم عايزين نعيش مع قول الله **"وَإِذِ ابْتَلَىٰ إِبْرَاهِيمَ رَبُّهُ بِكَلِمَاتٍ فَأَتَمَّهُنَّ"** البقرة : ١٢٤
 ١٠٠% فى كل ، ١٠٠% فى العبادة ، ١٠٠% فى الدعوة ، ١٠٠% فى الجهاد ، ١٠٠% فى الأخلاق
 والمعاملات ، ١٠٠% فى التضحية والمجاهدة ، ١٠٠% فى حب الله ، ١٠٠% فى الخوف والخشية والرجاء ،
 ١٠٠% فى المشاعر الإيمانية ، ١٠٠% فى كل حاجة يا جماعة ، عايزين نعيش ، مع إنه هو لما أتم كلمات الله ، لما أتم الإستقامة على مراد الله ربنا قال له **"إِنِّي جَاعِلُكَ لِلنَّاسِ إِمَامًا"** اصطفاه الله ، ومن هنا طريق الإصطفاء ،
 الإستقامة على مراد الله سبحانه وتعالى ، لأن المقدمة بتاعة الجزء الأولانى مقدمة فيها معانى كثير ، فهي استوعبت
 معظم الكلمة بتاعة اليوم أو الليلة ، و لأن بردضه شرحنا الترابط الإجمالى بتاع سورة البقرة
 اللهم اهدنا فيمن هديت ، وعافنا فيمن عافيت ، اللهم افتح على قلوبنا فى رمضان ، اللهم اجعل رمضان فتح مبينا
 علينا قلوبنا وإيماننا ، اللهم اهدى شباب المسلمين اللهم اهدى فتيات المسلمين اللهم بلغنا رمضان واعنا فيه على
 ذكرك وشكرك وحسن عبادتك ، اللهم اجعله فتحا علينا فى إيماننا ، واجعله فتحا على أمتك فى الهداية ، وفتح على
 أمتك فى النصر على أعدائها برحمتك يا أرحم الراحمين
 سبحانه اللهم وبحمدك أشهد أن لا إله إلا أنت أستغفرك وأتوب إليك

تم بحمد الله

شاهدوا الدرس للنشر على النت فى قسم تفريغ الدروس تفضلوا هنا :

<http://www.way2allah.com/forums/forumdisplay.php?s=d5fa851b936c6742ef5d2ac53524ee58&f=36>